

**Ki Riti-Khyndew
ba la buh
u Longshuwa-Manshuwa
jong ka Ri Bhoi**



LA LUM-LANG BAD LA PYNMIH
DA U

REV. FR. SNGI LYNGDOH, S.D.B.

KATKUM KA JINGKWAH

JONG KA RI BHOI DORBAR.



1965


Ki Riti-Khyndew
ba la buh
u Longshuwa-Manshuwa
jong ka Ri Bhoi

LA LUM-LANG BAD LA PYNMIH
DA U

REV. FR. SNGI LYNGDOH, S.D.B.

KATKUM KA JINGKWAH

JONG KA RI BHOI DORBAR.



CHECKED

1965

State Central Library
Shillong

ALL RIGHTS RESERVED
BY THE RI BHOI DORBAR.

Printed at the
DON BOSCO PRESS - SHILLONG

Ka Jingkdew-Sla

	Sla
Ka Ktien Lamphrang	5
Aiu Ki ong Ki Bor-Synshar bad kiwei pat	7
Ka LYNNONG I - Ka Jingthmu u Longshuwa - Manshuwa	12
Ka LYNNONG II - Ki Riti - Khyndew ba la buh u Longshuwa-Manshuwa ha Ri Bhoi	14
Ka LYNNONG III - "Ban Rep." "Katba Dang rep," Ka Rep-bhura," ka Dulir ki Nongsynshar Raid, ki Register, ka Ri Bam-Syiem, ka Jingbuh bynda	20
Ka LYNNONG IV - Ka jingidei jong ka Ri Bhoi bad ki nongsynshar raid bad ki Syiem hima	24
Ka SYNROP I - Ka jingiateh jutang ka Hima Myllem	32
Ka SYNROP II - Ki Jingkylli bad ki Jubah	36
Ka SYNROP III - Ki Shithi	38
Ka SYNROP IV - Ki Riti-Bishar ba la buh u Longshuwa-Manshuwa ha Ri Bhoi	42

KA KTIEN LAMPHRANG

Ban pynhun ia ka jingkwah ki paralok, kiba la wan sha ngi ha une u snem na Sor bad na Ri Bhoi, khamtam eh ki 'riewdkhot jong ka Ri Bhoi Dorbar, ynda ngi la tohkit bha na kito kiba kham nang-kham-tip ban ia ngi, ngi la lum-lang katto-katne ki Riti-khyndew ba la buh u Longshuwa-Manshuwa jong ngi ki Bhoi bad ngi la pynmih ia ki ha "U Nongsain Hima" ha ka saw, hynniew bad khatsaw tarik u Nailur, 1965.

La dap mynta ar bnai naduh ba ngi la pynmih ia kito ki riti ha ka kot-khubor. Hynrei uwei u Bhoi ruh um shym uxor-pyrshah (challenged). Kane ka pyni ba kito ki riti kiba ngi la lum-lang na ki tymmen-ki-san ki long ki badei bad kiba la buh da shisha da u Ni-u-Ma kulong jong ngi.

Nalor bym don uno-uno ruh uba uxor-pyrshah, ki tymmen-ki-san bad ki paidbah-paidlang na Ri Bhoi ki la thoh sha ngi, ban pyni ia la ka jungsngewbha bad jingsngewhun ba khatduh-khatwai ki Riti Khyndew ba la buh u Longshuwa-Manshuwa bastad jong ngi, ki la paw pyrthei. Bun ruh ki la kyrpad ia ngi ban pynmih ia kine ki Riti ha 1 kot-lyngkdop, khnangba ki Bhoi baroh ki dup lah ban tip ia kaba u Longshuwa-Manshuwa u la buh, ba kin pahuh ka rep-ka-riang bad ba kin im suk-im-sain ha la ki Raid ki Raid. (1)

Ki la don ruh kiba la kdew ia ngi katto-katne ki jingduna bad katto-katne kiei-kiei kiba ngi la klet, kum ka Nongmei-nongpa, ka khyndew-ia-duh, ka nongrim-ing, ka dulur ki nongsynshar Raid, ka Ri-Bam-Syiem, ka jingbuh-bynda bad ka jingkylla Raid. Ngia ainguh shibun ia kito ki para-Bhoi kiba la wan iathuh ha ngi ia kine kiei-kiei, bad kiba la kyrpad ia ngi ban pynmih ia ki ha ka kot.

Ngia sngew ba ngim dei ban kyntait ia kane ka jingkyrpad, na marba kane ka jingkwah ka pyni ba ki khun jong ka Ri Bhoi ki dang deid ia ka bad ia la ki Raid bad ba ki dang thrang ban kiew sha-phrang ha ka longbriew-manbriew.

Shuwa ban pyinkut ia kane ka Ktien Lamphrang, ngia sngew ba ngi dei ban ainguh ia u Shri B. P. Chaliha, u Chief Minister jong ka Assam, uba la pynshlur ia ngi ha ka 19 tarik u Nailur, 1965, ban pynmih kloia kine ki riti khnangba ki Bhoi kin suk bad kin laif na ka jingban-bein ki basian. Bad ban pyni ba ka jingpynshlur jong u

ka long ka bashisha, u la thoh, ha ka 17 tarik u Risaw, kawei ka shithi ka basngewtynnad. (2)

Ngi ainguh ruh ia u Bah E. Bareh, u C.E.M. jong ka District Council (K. & J. Hills). Uba la pyni ia la ka jingsngewhun ban iohi ia kine ki riti, kiban iarap ia U, ia ki Syiem Hima bad ia kiwei pat ki Bor-synshar, haba ki dei ban bishar ia ki Bhoi. (3)

Ka jingsngewnguh jong ngi ka leit ruh sha u Dr. Heraltan M. Reade. Wat la ngim iohi shuh ia u, hynrei u don ryngkat bad ngi. Katno sien u la ong ha ngi, "Nga tip ba ki Bhoi ki don la ki jong ki riti-khyndew bad kiwei pat ki dustur. Kan bha shibun lada ngi lum-lang bad pynmih ia ki." Kine ki dei ki ktien jong ka jingieid bad jingsngewlem! Bam kwai ha ing u Blei, Dr. baieid!

Ka ktien ka bakhatduh ka dei ha phi, ki hymmen-ki-para baroh ha Ri Bhoi, ba phin tip, phin ieid bad pyndonburom ia la ka Thain, da kaba bat ia kine ki RITI BABHA ba la buh u Longshuwa-Man-shuwa, da kaba trei smat bad da kaba im hok-im-shida.

Rev. Fr. Sngi Lyngdoh, S.D.B.

U Nonglum-lang bad Nongpynmih.

Ri Bhoi,

30-Risaw-1965

(2) Peit Sla 3.

(3) Peit Sla 4.

AIU KI ONG KI BOR-SYNSHAR BAD KIWEI PAT



U SHRI B. P. CHALIHA,
U Chief Minister ka Assam

**Dated Shillong,
The 17th October 1965**

My dear Father Sngi,

Thanks for the booklet on the Land Tenure System of the Bhoi Area.

The memory of your beautiful and fertile Area, visited by us last year, and of the warm welcome given us by the Bhois, is still fresh in our mind. Ever since that visit, the Bhoi Area has had a special place in our mind and heart. We believe that Nature has blessed it abundantly.

And the booklet on the Land Tenure System confirms our conviction. These simple laws really show the wisdom of your ancestors. A people that possesses such a Land Tenure System is truly blessed. What the Bhois must do now is to preserve this Land Tenure System, as handed down to them by their wise ancestors. The object of the Sixth Schedule of the Constitution of India is to preserve all the good things in the Customary Laws of our hill people.

My kindest regards to you and to all the Bhois.

Yours sincerely,

Sd/- Bimalaprosad Chaliha.

Ha ka ktien Khasi

Phadar Sngi baietd,

Khublei shibun na ka bynta ka kot-lyngkdop shaphang ki Ritt-Khyndew ha Ri Bhoi.

Ngidang kynmaw bha ia ka Ri baitynnad bad baseish jong pait,

ia kaba ngi la leit jngoh ha u snem ba la lah bad ngi dang kynmaw ia ka jingpdiaang-ieid jong ki Bhoi ia ngi. Naduh kato ka jingwan jong ngi shatai, ka Ri Bhoi ka la ioh ka jaka ka bakyrpang ha ka jingpyrkhat bad ka dohnud jong ngi. Ngì ngeit ba ka Mariang ka la kyrkhu ia ka Ri Bhoi.

Bad ka Kot-rit shaphang ka Riti-Khyndew ka pynskhem ia kane ka jingngeit jong ngi. Kine ki riti ki pyni ia ka jingstad jong u Longshuwa-Manshuwa jong phi. Ka jaitbynriew kaba don kum kine ki riti-khyndew ka long da shisha kaba la kyrkhu. Mynta ki Bhoi ki dei ban bat ia kine ki riti-khyndew ba ki la ioh pateng na u Longshuwa-Manshuwa jong ki. Ka jingthmu jong ka Sixth Schedule jong ka Constitution jong ka Ri India, ka long ban ri ban bat ia kiei-kiei ki babha ha ki ain-ki-hok-ki-riti-ki-dustur jong ki 'riewlum jong ngi.

Khublei ia phi bad ia ki Bhoi baroh.

2) **U BAH E. BAREH,**

U C.E.M. jong ka District Council (K. & J. Hills)

Dated Shillong,

The 16th October, 1965

Phadar Sngi baieid,

Ki riti-khyndew ha Ri Bhoi, kiba phi la lum-lang, ki la wallam ka jingkyrkhu bad ka jingiarap ia ki Bhoi bad ia ki Bor-synshar ruh.

Ngì kyrmen ba ki Bhoi kin pdiang, kin niewkor bad kin bat ia ki, ba kin kiew shaphrang kum kiwei pat ha ki Lum Khasi-Jaintia jong ngi.

Khublei shibun.

Uba burom ia phi,

Sd/- E. Bareh (C.E.M. District Council)

3.

Nga la ioh lad ban pule ia ka jingthoh i Rev. Father Sngi kaba iadei bad ki Ain Khyndew jong ka Ri Bhoi ba la buh da u Longshuwa-Manshuwa. Kane ka long da shisha ka jingkyrkhu ia ka jaitbynriew jong ngi. Kine ki long kiba dei bad ba shisha ba la ju buh naduh mynshuwa da ki Kpa Tymmen jong ngi bad kiba ngi dei ruh ban pynsah bad bud ia ki.

Nga pynpaw ia ka jingkmèn bad jingsngewnguh ia u nonghum uba la tit bniah bad ialeh shitom bad buh ha ka jingthoh.

Dated : Nongspung,

The 11th Nov. 1965.

Sd/- Jidon Singh Syiem,

Deputy Syiem Langin-Syiemship.

Ngi la ioh ban pule ia ki hok ki riti-khyndew ba la seng la sot da u Longshuwa-Manshuwa jong ngi ha Ri Bhoi.

Ngi kum ki nongsynshar ngim lah khlem da pyni ia la ka jing-sngewbha ba la paw pyrthei ki hok ki riti jong ngi. Katkum ka jing-shem jong ngi, haba ngi laid kylleng ka Ri Bhoi, ka long shisha kumba phi la thoh. Bad ia lade hi ngi ngeit ba kin iarap ia ki Bhoi baroh baroh ban kiew shaphrang.

Dated Jirang,
16-11-1965.

Sd/- Ka P.S. Syiem (Kong Bon)

4) NA U BAH J. RYNSHON
U M.D.C. Ri Bhoi.

Dated Mawlong
The 21-10-1965

Rev. Fr. Sngi,

Lem bad kiwei pat ki para-Bhoi, nga sngew ba nga dei ban pyni ia la ka jingsngewhun ba phi la leh shitom ban lum-lang ia kito ki hok-ki-riti jong ngi ki Bhoi. Ki Bhoi baroh ki dei ban sngewnguh ia phi na ka bvnta kane ka jinglehshitom jong phi

Haduh kine ki sngi, ki biew ki tip tang khyndiat eh shaphang ka Ri Bhoi, shaphang ki ain-ki-riti jong ka bad shaphang ki Bhoi. Kine ki riti kin iarap ia k Bor-synshar ban tip shaphang jong ngi.

Khublei shubun eh.

Uba burom ia phi,
Sd/- J. Rynshon, M.D.C.
Nongpoh Constituency

5) KA RI BHOI DORBAR.

Umsning (Ri Bhoi)
15-Risaw-1965

Phadar Sngi bateld,

Kumba ma-nga u Secretary jong ka Ri Bhoi Dorbar bad ki riew-dkhot jong ka, ngi la kyrpad ia phi ban lum-lang ia ki hok-ki-riti ba la buh u Longshuwa-Manshuwa, mynta pat ngi kwah hi-ki ba phi pynmih ia ki ha ka kot-rit.

Ia kine ki hok-ki-riti ka Ri Bhoi Dorbar ka la ithuh bad ka pdiang; bad ka kyntu ia ki para-Bhoi baroh ban tip ia ki bad ban bat ia ki na ka bynta ka jingbha jong ki bad jong ki khun jong ki lashai-la-shisngi.

Ka Ri Bhoi Dorbar ruh ka sngewnguh ia phi ba phi la ai noh ha ka ia ka Copy Right. Bad ka Durbar kan shimti bad kan kitkhlieh ia kano-kano ka kam ne ka jingjia kaba iadei bad kine ki riti ba la pynmih. Ym tang kata, ka Dorbar kan ialeh katba lah la ka bor ban iada ia kine ki hok-ki-riti ba la hiar pateng na u Ni-u-Ma kulong bastad jong ka Ri Bhoi. Bad ka Dorbar kan kynjoh ktien ia phi man la ka por ba kan phah shon ia kine ki riti.

Khublei shibun eh.

Sd/- J.M.Roy (Secretary Ri Bhoi Dorbar)

Dlosingh Lyngdoh,

D.D. Lapang,

Kobal Lyngdoh,

B.S. Matlang,

Thren Bhoibalieh

E.S. Lyngdoh,

L. Lapang,

M.B. Lyngdoh,

Dlan Ramde,

Drink Rymbai.

6.

"Nga la pule ia ki riti-khyndew ba phi la lum bad pynmih ha ka Kot-khubor. Phi la leh bha da shisha. Bad ngam banse ban iaroh ia phi na ka bynta kane. Kine ki jynthoh ki dei kawei na ki "Contributions" bakongsan eh jong phi na ka bynta ka jingbha bad jingroi jong ka Ri Bhoi." (1)

U Bah Jerlie Tariang,

Congress President, United K. & J. Hills.

(1) Ia kine ki ktien u Bah Jerlie Tariang u la kren (expressed verbally) ha ka 22 tarik u Nailar, 1965, Sngi u Trai, ha ka G.S. Road, pyrshah ka Hoping Restaurant bad ka Standard Engineering, katba ngi dang iaid ban leit sha Police Bazar. U dang wan na Police Bazar, ha ka jeep, ryngkat bad

ka lok bad ki khun-ki-kti. U tang shu iohi ia ngi, u la pynsangeh ia la ka jeep bad u la kren, ha katei ka sngi, ha ka por kumba 4.30 p.m., ia kine ki ktien ki basngewtynnad shaphang ki riti-khyndew ba la buh u Longshuwa-Manshuwa 'jong ngi ki Bhoi.

7.

Rev. Fr. Sngi Lyngdoh,

Sngewnguh shubun ban iohi ia ka kot-khubor jingpynshai jong phi, ia ki hok tynrai jong ngi ki Bhoi halor ka jingiadei bad ki khyndew ki shyiap jong ngi

Ma-nga u Bhoi paka nga sngew ba ka long kaba dei eh ha ka jingtip jong nga hi bad ruh na ki kiaw, ki kthaw pateng jong ngi ka long thik kumba phi la pynshai

Nga sngew bad pynskhem ruh ia ka.

Khublei

Uba burom bad sngewnguh eh ia phi,

Sd/- E. H. Mallai.

(Senior Gram Sevak, Ri Bhoi)

8.

Father Sngi,

Nga sngewkmen shikatdei eh ban ioh pule ia ka jingthoh jong phi na i Bah D D Lapang shaphang ka Ruti khyndew bad ki jingiadei jong ka, ba la buh la sot da ki long shuwa man shuwa, na ka bynta jong ngi ki Bhoi ban sa buh ia ka ha i kot lyngkdop.

Ialade hi nga ngeit skhem u Blei lyngba jong phi u pynpaw pyrthei da ka thoh ka tar ba kan long da shisha ka jingkyrkhu ia ka Ri Bhoi jong ngi.

Dated Umroi,
5th November, 1965.

Sd/- Rev. S. Mallai,
(Pastor-in-charge, Umroi)

KA LYNNONG I.

KA JINGTHMU U LONGSHUWA - MANSHUWA

Shuwa ba ngin kren shaphang ka jingthmu, haba la buh ia ki Riti-Khyndew, ngi kwah ban thoh shi kyntien shaphang ka mynsiem-leid-mynsiem-niewkor-para-briew jong u Longshuwa-Manshuwa jong ngi.

Kane ka mynsiem-niewkor-para-briew ka paw shai-kdar ha ki riti ba ngin sa pule harum. Bad dei kane ka mynsiem-niewkor-para-briew kaba la pynbor, kum ban ong noh, ia u Longshuwa-Manshuwa jong ngi ban niew ia u paidbah-paidlang u trai-khlieh-duh jong man la ka Raid ha Ri Bhoi. Kata ka mut, ba ka Raid ka dei ka ri-kynti jong paidbah-paidlang. (1)

Namarkata, ha Ri Bhoi jong ngi ym ju don kum kita ki jait-heh-jait-hain ne ki jait-rit-jait-poh. Baroh ki paidbah-paidlang ki long kumjuh bad ki don ha kajuha ka kyrdan kum ki briew.

Khatduh eh, kane ka mynsiem-niewkor-para-briew ka dei ka nongpyni-nongialam-lynti ha kiei-kiei baroh kiba u Longshuwa-Manshuwa jong ngi u la leh, khamtam eh haba u la mut ban pynmih ia ki Riti-Khyndew, kiba ktah ia ka jingim u paidbah-paidlang.

KA JINGTHMU

Ka jingthmu ka banyngkong bad ka bakongsan eh jong u Longshuwa-Manshuwa ka Ri Bhoi, haba u la pynmih ia ki Riti-Khyndew, ka long ban ai-lad ia u paidbah-paidlang baroh ban rep-ban-riang pahuh katba lah la ka bor.

U Longshuwa-Manshuwa jong ngi ki Bhoi um shym kwah ba tang katto-katne ki kur-ki-jait, ki ing-ki-sem ne ki briew ki bastad

(1) Ha Ri Bhoi ia u paidbah-paidlang jong ka Raid la khot u "Trai-Raid", ym "u Trai-Khyndew." Ka kyntien "Trai Khyndew", ha ka jingsangewthuh jong ki Bhoi hyndai, ka dei ka kyrteng jong u Blei, Nongbuh-Nongthaw. Namarkata, ki Longshuwa-manshuwa jong ngi kim ju nud ban khot ia lade "U Trai-Khyndew ne

Ka Trai-Khyndew"; hynrei ki niew ia lade tang ki nongpyndonkam ia ka Khyndew kaba dei ka jong u Blei, Uba la aiei ia ka ha u briew na ka bynta ka jingdonkam jong u bad jong kiwei pat ruh. Ki briew ki dei ki trai jong ki diengsoh-diengpai ba ki la chung da lade.

bad ki bashalak-khwap-lalot, kin loh lut ia ka khyndew, ia ki khlaw-
ki-btap, ne ba kin pahuh tang ma-ki hi ha ka bam-ka-dih, katha kiwei
pat kin shu ang ryngheng kum ki muid basliang um bad ban long-
mraw khlem tynrai ha la ka jong ka Raid, kaba dei ka jong ki.

Namarkata, u Longshuwa-Manshuwa bastad jong ngi u la pyn-
mih ki Riti-khyndew ki babha bad ki bajanai haduh katta-katta. Nga
tharai ba ngin ym lah ban shem hangno-hangno ruh kum kine ki riti-
khyndew ki babha, kiba lah ban pynduh-thiaw ia ka jingkhwan-lalot
shimet-shimet, ki riti-khyndew kiba pyrkhath shaphang ka jingbha u
paidbah-paidliang, shaphang ka jingbiang ka sem-shiliang-ka-kup-shi-
liang, ki riti kiba pynkynmaw ia ngi ki Bhoi ba ngi dei shi-para bad
ba ia ka khyndew, ki khlaw, ki lum, ki wah, la aiei da u Blei na ka
bynta ki briew baroh, ym tang na ka bynta uwei-arngut ki bastad-
khwan-lalot. Ban kren lyngkot, u Longshuwa-Manshuwa u la buh
ia ki riti-khyndew na ka bynta ka jingbha u paidbah-paidliang nadong-
shadong.

KA LYNNONG II

KI RITI-KHYNDEW

BA LA BUH U LONGSHUWA-MANSHUWA HA RI BHOI

Ki Riti-Khyndew ki bakongsan eh, kiba la buh u Ni-u-Ma kulong jong ngi ki Bhoi ki dei kine harum -

Ka Riti 1. Ka Raid baroh kawei ka dei ka jong u paidbah-paidlang jong ka Raid.

Kumba baroh ngi tip, ia ka Ri Bhoi baroh la bynta ha ki Raid. Ia kine ki Raid la synshai da ki Syiem, ki Lvngdoh, ki Pator, ki Basan ne Sordar Raid, kiba long tang ki nongsumar bad ki nongpynaidkam Ki trai jong ka Raid baroh kawei ki dei ki babun ki-balang jong ka Raid. Ka khyndew jong ka Raid, ki khlaw-ki-btap bad ki lum-ki-wah jong ka baroh ki dei *ki Ri-kynti jong u paidbah-paidlang*. Namarkata, ia ka Raid bad ia ka khyndew jong ka, u Longshuwa-Manshuwa jong ngi ki Bhoi u ju khot "*Ka Raid-bam-lang*," kata ka mut, ba baroh ki briew jong ka Raid ki dei ban ioh ia ka bam-kadih na ka khyndew jong ka Raid Ngilah ban ong ha, katkum ki riti-khyndew ba la buh u Ni-u-Ma kulong bastad jong ngi, *ym ju don* ha Ri Bhoi baroh kawei kum kata kaba ki khot, ha kiwei pat ki jaka ha Ri Khasi, "*ka Ri-kynti ueibriew*." Ym ju don bad ym don uba lah ban kam "*Ri-kynti*" ia kano-kano ka khyndew jong ka Raid, ne ia ki khlaw-ki-btap jong ka namarha ka Raid baroh kawei ka dei ka ri-kynti jong u paidbah-paidlang

Ka Riti 2. Uwei-pa-uwei u briew jong ka Raid u lah ban rep kat haba u mon bad katba u lah la ka bor.

Ia ka khyndew, kaba don hapoh ka Raid, u paidbah-paidlang jong ka Raid u lah ban rep katba mon, kat haba u mon bad katba u lah la ka bor Lada u lah ban rep shi lum, to un rep shi lum, lada u lah ban rep shuteng lum, to un rep shuteng lum; lada u lah ban rep shi pawa lum, to un rep shi pawa lum bad lada u lah ban rep tang khyndiat, to un rep tang khyndiat, bad lada jia ba u lah ban rep shiphew lum, to un rep shiphew lum.

Ka Riti 3. Katba u briew u dang rep ia ka khyndew, kato ka khyndew ka dei ka jong u.

Katba u briew u dang rep ia ka khyndew, kato ka khyndew ka dei kum ka Ri-kynti jong u, bad ym don ba lah ban shim ne knieh noh ia ka na u. Katba u dang rep, u dei ma-u u trai khyndew. Ki Syiem, ki Lyngdoh, ki Pator bad ki Sordar Raid ne Basan, kim ju donhok bad kim ju donbor ban leit mushlia ha ka khyndew kaba u briew u dang rep. U Longshuwa-Manshuwa jong ngi ki Bhoi u khein, ba ka long ka sang-ka-ma ban shim ne knieh jubor ia ka khyndew kaba u briew u dang rep, *namarba ka long kum ka Ri-kynti jong u*, katba u dang rep.

Khatduh eh, katba u briew u dang rep, ka khyndew ka dei kum ka Ri-kynti jong u. Kane kam mut tang ka snieh khyndew, hynrei kiei-kiei baroh, kiha don ha snieh khyndew ne hapoh niamra, ki dei ki jong u. Na ka jaka ba u briew u dang rep, ym don ba lah ban leit tih maw, ne leh eiei kaba lah ban pynwit ia ka jingrep jong u. Ha ka jaka ba u briew u rep, u dei ma-u u trai bad u khlieh duh.

Ka Riti 4. Lada u briew u iehnoh ban rep ia ka khyndew kumba Lai Snem, kato ka khyndew ka kylla biang ka jong u paidbah-paidlang.

Ka khyndew kaba u briew u iehnoh ban rep kumba lai snem, ka phai biang sha ka Raid bad ka kylla noh ka jong u paidbah-paidlang bad uno-uno uba kwah ban rep ia kato ka khyndew u lah ban rep katba mon khlem don jingwit eiei. Lada uto, uba la iehnoh ban rep ia ka khyndew kumba lai snem, u ufor, ka ufor jong u ka long ka bymhok bad u Longshuwa-Manshuwa jong ngi um ju patlaw ia kum kata ka ufor bymhok, kaba pyni tang ka mynsiem khwan-lalot-shimet-shimet.

Ka Riti 5. Ka khyndew kaba u briew u da pan ban rep, hynrei kaba um lah ban rep hapteng lai snem, ka kylla biang ka jong u paidbah-paidlang.

Ka lah ban jia ba u briew u da pan kyrpang na ki nongsynshar Raid ban rep ia kawei ka jaka bakyrpang. Ia kum kane ka jingpan kim ju kyntait.

Ynda la bishar bha ia ka bor-rep jong u briew, ki ai tang katba u lah ban rep hapteng lai snem. Bad ynda la ai ha kane ka rukom, kato ka jaka ka long kum ka Ri-kynti jong u briew uba la pan khnang ia ka.

Hynrei lada hapteng lai snem um lah ban rep lut, kato, kaba tam bad dang sah shrah, ka kylla biang ka jong u paidbah-paidlang bad uno-uno u lah ban rep khlem jingwit eiei.

Lada ka 'dei ka jaka-pynthor, ka bajysieh bad bajem than, wat la u briew um pat lur ne bet kba hpdeng lai snem, hynrei lada u tih-khap bad u 'iai pynbha 'ia ki khap man la u snem, ka long hi kumba u la rep. Namarba, ban tih-khap khnang ban pyneh bad pynrkhiang 'ia ka pynthor, ka long ka rep, katkum ka jingbuh u Longshuwa-Manshuwa.

Ka Riti 6. Ka jingdie-duh-khyndew kam lah ban don ha Ri Bhoi.

Kumba la ong haneng, ha Ri Bhoi ym lah ban don da shisha ka "*Khyndew-mar-kynti-weibriew*." Lada ym don ka khyndew-mar-kynti-weibriew, kam lah ruh ban don ka jingdie-duh-khyndew. ka don tang kato kaba ngi ki Bhoi ngi khot "*Ka Jingsiew-ia-ka-bai-lut-bai-sep*." Kata ka mut, haba u briew u ai noh ha uwei pat 'ia ka jaka kaba u la rep lypa, uto, uba 'ioh 'ia kata ka jaka, u siew tang ka bai-lut-bai-sep, kaba lah ban long da ki hajar. Ka jaka ka dei ban long kaba la rep lypa. Lada ka dei ka "*dewshrah*", ym don ba lah ban dawa bai-lut-bai-sep eiei.

Ka Riti 7. Hadien Hynniew Snem ba la iehnoh ia ka Nongmei-Nongpa khlem-rep, kato ka khyndew Nongmei-Nongpa ka kylla biang ka jong u paidbah-paidlang!

Katkum ka jingiathuh jong kiba kham nang-kham-tip ban ia ngi. ka *Nongmei-Nongpa* ka dei kato ka pynthor ne lyngkha kaba la rep bad hiar pateng-la-pateng ha kajuha ing ne ka kur. Hynrei, khnang-ba ka khyndew kan long da shisha ka *Nongmei-Nongpa*, ka dei *ban hiar pateng*, katkum ka jingiathuh jong kiba kham tip, *la kumno-kumno shiphew pateng*. Tharai, lada u briew u thied ne rep ia kawei ka pynthor bad dei ma-u uba sdang ban rep nyngkong na kato ka ing ne ka kur, ynda u la iap, kato ka pynthor kam pat long ka *Nongmei-Nongpa*. Kum kane ka pynthor, kabym long *Nongmei-Nongpa*, lada iehnoh kumba lai snem ban rep ia ka, ka kylla biang ka jong u paidbah-paidlang. bad uno-uno uba kwah ban rep ia ka, u lah ban rep khlem jingwit eiei.

Na kane ka paw shai-kdar, ba ka nongrim jong ka *Nongmei-Nongpa* ka dei ka jinghiar-pateng, la kumno-kumno shiphew pateng, ym kata kaba ki khot ka "Register" ne kaei-re-kaei.

Namarba ka Nongmei-nongpa ka dei ka lyngkha ne pynthor kaba hiar pateng la slem bha ha kawei ka ing ne ka kur, lada jia ba ki trai kim rep shuh ia ka na kano-kano ka daw, ka kylla biang ka jong u paidbah-paidlang hadien hynniew snem, ym hadien lai snem kum kiwei pat ki pynthor ne ki lyngkha kibym pat dei ki nongmei-nongpa.

Ka Riti 8. Ka khyndew-iap-duh ka leit sha ka jingsumar ki Syiem, ki Lyngdoh, ki Sordat ne Basan Raid, na ka bynta u paidbah-paidlang jong ka Raid.

Ia ka pynthor kaba la hiar pateng la slem ha'kajuh ka ting ne ka kur bad kaba la jan long nongmei-nongpa, lada jia ba ki nongloh-pateng ki iap noh baroh, ngi ki Bhoi ngi khot ia ka 'Ka Khyndew-iap-duh,' bad ka hap shisyndon hapoh ka jingsumar ki Nongsynshar Raid na ka bynta u paidbah-paidlang, uha dei u trai jong ka, mynta bym don nongloh-pateng shuh.

Ia kum kine ki khyndew ki Nongsynshar Raid kim don hok ban die ne ai ha uno-uno u briew nabar ka Raid, khlem ka jingmyrfur u paidbah-paidlang Bad lada jia ba ki la die ne ai khlem ka jingtip-lem jong u paidbah - paidlang, kato ka jingdie ne jingai ka long ka bymhok, katkum ka jingbuh u Ni-u-Ma kulong jong ngi ki Bhoi, bad ka dei ban leit biang sha u paidbah-paidlang.

Namarba ka khyndew-iap-duh ka hap hapoh ka jingsumar ki Nongsynshar Raid ym don ba lah, napoh ka Raid ne nabar Raid, ban shu shim kurup ia ka Lada jia ba u briew u shu shim ia ka, khlem ka jingtip-lem ki Nongsynshar Raid bad ki paidbah-paidlang, u dei ban pynphai noh ia ka sha ki Nongsynshar Raid ban sumar bad ban pyniad na ka bynta u paidbah-paidlang.

Ka Riti 9. Lada jia ba u briew u mih na ka Raid A, ban leit shong shnong ha ka Raid B, ka pynthor ne lyngkha ne kper, kaba u la rep lypa, katba u dang sah ha ka Raid A, bad kaba u dang kwah ban iai rep, wat la u la leit sha ka Raid B, ka dang dei ka jong u bad ym don ha lah ban knieh ia ka na u, lada kam dei ka jaka rep ka shnong kum ka shnong. Cfr 10

Bun sien ka jia ba ki Bhoi ki kwah ban leit shong sha kawei pat ka Raid bad ha kajuh ka por ki kwah ban nang iai rep shuh-shuh ia ka pynthor ne lyngkha ne kper kaba ki la rep lypa ha ka Raid na kaba ki la mih noh Kato ka pynthor, ka lyngkha ne ka kper ka dang long kum ka ri-kynti jong ki bad ym lah ban shim noh ia ka na ki, katba ki dang rep.

Ka Riti 10. Kano-kano ka shnong ka don hok ban buh ka jaka bakyrpang na ka bynta ka rep-ka-riang jong ka shnong kum ka shnong.

Ki shnong jong ka Raid, lada ki kwah, ki don hok ban loh na ki nongsynshar Raid kawei ka jaka hajan shnong, ka jaka kaban biang ia ki ha ka rep-ka-riang. Ia kane ka jaka ki ju lasan ba ki ing jong ki shnong.



Lada kano-kano ka ing ka mih noh na ka shnong, ka jaka kaba ka rep ka kylla biang shisyndon ka jong ka shnong kum ka shnong.

Ka Riti 11. Na ki Lawshnong ki trai-shnong ki lah ban ioh katba mon ia ki dieng-ki-siej ban pyndonkam na ka bynta ia lade.

Lada ki kwah, ki shnong jong ka Raid ki don hok ban don ka lawshnong, na kaba ki trai-shnong baroh ki lah ban ioh, katba ki mon bad katba ki donkam na ka bynta ia lade, ia ki dieng-ki-siej ban shna ing, ban ker kper bad ban thang ha la i jong i rympei.

Ym bit ban pom bad ban kit ia ki dieng-ki-siej na ka lawshnong ban die sha iew, laitnoh haba ka shnong baroh kawei ka mynjur ban leh kumta na ka daw ka jingiaphthngan ne na kano-kano ka jing-donkam bakyrpang, kum ban iarap ia ki ing ki baduk-sat ne ia ka riewkynthei bapli.

Ha ka lawshnong ym bit ban leit rep ne ban leit pynbam phlang ia ki masi-ki-muid, namarba ia u phlang jong ka lawshnong ki trai-shnong ki donkam ban sop ing.

Wei ba ki nongsynshar Raid ki la ai ia kane ka lawshnong, da ka kynja dular, ym don ba lah shuh ban knieh noh ia ka na ka shnong, khlem ka jingmynjur jong ka shnong baroh kawei.

Ka Riti 12. Ka Nongrim-ing.

a) Ki brieve jong ka Raid ki lah ban shna ing, sem-masi-sem-sniang-sem-syiar, ha kano-kano ka jaka kaba ki sngewbit, lait noh ka jaka ba dang rep ki brieve, ka lawshnong, ka jaka rep jong ka shnong kum ka shnong (cfr. 10), ki jaka thang ne tep-brieve, hapdeng lynti ba ju iaid u paidbah bad ha ki madan ialeh-kai jong ka shnong ne jong ki skul.

b) Katba u brieve u dang shong, katba ka ing ka dang bha dang ieng, ka nongrim-ing bad khyndiat ka jaka sawdong ka ing jong u, ka dei kum ka ri-kynti jong u bad ym lah ban knieh noh ia ka na u.

c) Lada u brieve u pynpra noh ia la ka ing bad u kynriah-ing shawei pat, kato ka nongrim-ing ka kylla biang shisyndon ka jong u paidbah-paidlang, lada um rep kper ia ka.

Ka Riti 13. Ka Lawraid.

Ka Raid kum ka Raid ka lah ban jied kawei ka khlaw kaba kham bha bad kaba kham mih, na ka bynta ka jingmynatoi u paidbah-paidlang jong ka Raid baroh kawei.

Ha kane ka 'Lawraid ba la jied kyrpang, ym lah ban rep, ym lah ban leit pom dieng kulmar, khlem ka jingmyrfur bakyrpang jong ka Raid. Ym lah ban die ne ai ia ka ha u mynder lano-lano ruh.

Hynrei teng-teng ka la jia ba ki nongsynshar Raid ki kum klet ba ka dei ka 'Lawraid bad ki kum ai noh ia ka ha kawei ka shnong ban pynlong 'Lawshnong ia ka. Haba jia kumne, u paidbah-paidlang, uba tip, u don hok ban iathuh ia ka jingshisha ha ki nongsynshar Raid bad ia kane ka jingiathuh jong u babun-u-balang ka Raid ka ju shah-shkor borabor. Ki pynlong ka Dorbar Pyllun jong ka Raid bad ki pynbeit ia kane ka kam da lade hi, khlem da leit sha kiwei pat ki Bor, namarba ki khein ba ka dei ka sang pyrshah ka ing-ka-sem la jong, kaba dei ka Raid, ban kyrpad ia kiwei pat ban pynbeit ia ka kam-ing-kam-sem. Ynda ki la shem ba ka dei da shisha ka 'Lawraid ba la jied kyrpang da ka jingsuk ki ai ha kato ka shnong da kawei pat ka khlaw, ka babha kum ki 'lawshnong jong kiwei pat ki kyntoit; bad ka 'Lawraid ka phai biang sha ka Raid.

Kane ka dei kawei na ki nuksa kiba pyni ba, ha ka por u Ni-u-Ma kulong jong ngi, ki nongsynshar Raid bad u paidbah-paidlang ha Ri Bhoi ki la long ki babha-mynsiem bad ki bakylluid-jingmut.

KA LYNNONG III.

Ha ka Lynnong ka ba-ar, ngi la kren shaphang katto-katne ki riti-khyndew bakongsan, ba la buh u Longshuwa-Manshuwa ha Ri Bhoi.

Mynta ngi kwah ban batai sa katto-katne kiei-kiei, khnangba ngin sngewthuh bha ia kine ki riti ba la buh u Ni-u-Kong hyadai jong ngi.

1. Ka Riti III ka ong ba "*Katba u briew u dang rep ia ka khyndew, kato ka khyndew ka dei ka jong u.*"

U Longshuwa-Manshuwa jong ngi u mut aiu "*Ban rep*", bad "*Katba dang rep*"?

Katkum ka jingtip jong ngi bad katkum ka jingiohi jong ngi da ki jong ki khmat, "*Ban rep*" u Longshuwa-Manshuwa jong ngi um shym mut tang ban puh ne lur; hyurei u mut ruh ban thung ki shken, ki diengsoh-diengpai, ki diengkseh, ki kait bad kiwei pat ki kynja jynthung. Ban shu kren lyngkot, "*Ban rep*" ka mut ban pynseisoh ia ka khyndew, da la ka jong ka umsyep, ym da ka jingaiei jong u Blei bad jong ka Mariang basbun ia baroh.

Kumjuh ruh, "*Katba dang rep*" kam mut katba u dang lur ne puh. Ka mut ruh katba ki shken, ki diengsoh-diengpai, ki kseh ba u la thung, ki kait bad kiwei pat ki jynthung kiba u briew u la thung da la ki kti bad da la ka umsyep, **KI DANG DON**, ki dang seisoh bad ki dang pynmyntoi ia u nongthung jong ki. Kata ka mut katba ki dak jong ka umsyep jong u ki dang don bad ki dang seisoh ia u.

Ngi la ong, "Ki dak jong ka umsyep jong u nongthung-nongtep." Hyurei kam biang bau thung tang uwei-ar u kseh ne uwei-ar u diengsoh ha ka jaka ka baheh, ban dup ong ba u briew u dang rep. Khnangba u briew un dup lah ban ong ba u dang rep, namarba ki dak jong ka umsyep jong u ki dang don bad ki dang seisoh-pynmyntoi ia u, ka jaka ka dei ban long kum ka kper kaba dap da ki diengsoh-diengpai, kaba dap da ki kseh bad kiwei pat ki jynthung. Lada u briew u thung uwei u diengsoh ne uwei u kseh kumba shiteng phurlong, ne shi phurlong ne shiteng mer hadien uwei pat, kato ka jingleh kam dei ka rep. Te ia kato ka jaka kaba hapteng kito ki artylli ki dteng, uno-uno u briew u lah ban rep.

2. Na kine kiei-kiei kiba la ong haneng, ka paw shai-kdar ba ia "*Ka Skut-jaka, khlem rep*," u Longshuwa-Manshuwa jong ngi ki

Bhoi um ju tip bad um ju bna. Ka dei kaei-kaei kaba la mih tang ha kine ki sngi, bad kam dei ka riti Bhoi da lei-lei ruh em.

Na kine kiba ngi la thoh haneng, ngi lah ruh ban iohi ba u Longshuwa-Manshuwa jong ngi ki Bhoi u la sangewthuh bha ba la kiei-kiei, kiba u Blei u la aei bad kiba ka Mariang ka pynmih da lade hi, ym bit ban kam mar-kynti weibriew; hynrei ki dei ki jong u paidbah-paidlang jong ki Raid. Dei na kane ka daw ba haba uno u iehnoh ban rep ia ka khyndew kumba lai snem, khlem rep, ki phlang-khlaw, ki dieng-ki-siej-khlaw, bad kiei-kiei baroh kiba shu mih hi da lade, ki dei ki jong u babun-u-balang, bad u babun-u-balang u lah ban pyndonkam ia ki katba mon khlem jingwit eiei.

3. Ha Ri Bhoi jong ngi ka don ruh kata kaba ngi khot "Ka jingairep-bhura." Ban airep-bhura ka mut ban aiwai ia ka khyndew ne pynthor, ba la rep lypa, ha uwei pat u briew. Ym ju lah ban airep-bhura ia ka khyndew ne pynthor kaba ym shym la rep lypa mynno-mynno ruh.

Katba u briew u dang airep-bhura ia ka khyndew ne pynthor, ka long thik kumba u dang rep hi da lade. Te katba u dang airep-bhura, ka khyndew ne pynthor ka dei ka jong u, bad ym don ba lah ban knieh noh ia ka na u.

4. Ka Jingai-dulir ki Nongsynshar Raid. (1)

(a) Khnangban ym mih kano-kano ka jingkulmar, ki Bhoi ki ju shum dulir na ki Nongsynshar Raid na ka bynta ki pynthor kham-tam eh. Kane ka dulir ki Nongsynshar Raid ka long ka badonkam, haba ai ha uno-uno ia ka khyndew-iap-duh, da ka jingiatip-lem u paid-

(1) a. Ka ktien "Nongsynshar Raid" ka kynthup ruh ia ki Sordar shnong bad Rangbah-shnong, namarba kano-kano ka kam-shnong kam lah ban long lada ym da iatup lem ki sordar shnong ne ki Rangbah-shnong. Ba ka dulir kan long ka baskhem bha, la biang, namar-kata, ba uwei u Nongsynshar Raid bad uwei u Sordar shnong ne Rangbah-shnong kin soi-kyrteng ne shonti ia ka. Haba iadie-iathied ia ki pynthor ne kper ba la rep lypa, kane ka jingsoi-kyrteng ne jing-shonti jong ki nongsynshar Raid ka la biang bad ym don kam eiei shuh. Ka jingniewkor jong ki Bhoi hyndai ia ki nongsynshar Raid

ka long haduh katta, ba ka ktien hok, ka jingsoi kyrteng ne ka jing-shonti jong ki ka la biang ban pyn-beit ia kano-kano ka kam. Hynrei mynta ki don katto-katne ki Bhoi kibym burom shuh ia la ki nongsynshar Raid; ki kham burom pynban ia u nongwei, u mynder shi sngi bad ki pan ki kot-ki-sla aiure na ki. Ki don ruh katto-katne ki nongsynshar Raid kiba la klet ia la ka kyrdan-hymmen bad kiba la khein-poh ia la ka bor, tad haduh ba ki la die bym-hok ia la ka barom bad ka bor, ba la ai ha ki da u Longshuwa-Manshuwa, ha ki Ba-san aiure nabar ka Ri Bhoi.

bah-paidlang bad ki nongsynshar Raid. Khlem kane ka dulir jong ki nongsynshar Raid bad ka jingmynjur u paidbah-paidlang, ka jingbat ia ka khyndew-iap-duh ka long ka bymhok, katkum ka jingbuh u Longshuwa-Manshuwa jong ngi. cfr. sla 13, Riti 8.

(b) Haba u briew u ai noh ha uwei pat ia ka pynthor ne kper ne lyngkha ba u la rep, ka jynthoh kaban pynsakhi ba uto, uba ioh ia ka pynthor ne kper ne lyngkha, u la siew ia ka bai-lut-bai-sep baroh, ka long ka badonkam. Ha kane ka jynthoh ki dei ruh ban soi-kyrteng uwei ne ar-ngut ki Nongsynshar Raid, bad kane ka jynthoh ka long kum ka dulir ba la ioh na ki nongsynshar Raid. (1)

5. Ki Register kim da donkam ha Ri Bhoi.

Namarba, katba u briew u dang rep ia ka khyndew, kato ka khyndew ka dei kum ka ri-kynti jong u bad ym don ba lah ban knieh noh ia ka na u, ki jynthoh Register kim donkam eiei. Katkum ka jingbuh jong u Longshuwa-Manshuwa jong ngi, wat la u briew u "register" ia kano-kano ka khyndew, lada um rep hi, kato ka khyndew ka dei ka jong u paidbah-paidlang.

Ha kine ki snem ka Register ka la mih ; hynrei kam dei kaba la buh u Ni-u-Ma kulong jong ngi. Ka daw ka long ba katto-katne na ngi ki Bhoi ngi la klet ba, katkum ka riti ba la buh u Longshuwa-Manshuwa jong ngi, katba u briew u dang rep ia kano-kano ka jaka, kato ka jaka ka dei kum ka ri-kynti jong u bad ym don ba lah ban knieh noh ia ka na u; bad ki tharai ba da kaba "register" ka khyndew jong ki kan skhem, wat la kim rep da ki phew snem ruh. Kane ka jingpyrkhat bad jingleh ka long pyrshah ki riti u Ni-u-kong hyndai jong ngi.

Ka jingpynmih ia ki Register kan wallam ka jinglanot ka bakhraw ha ngi ki Bhoi. Ki lah ban "register" tang ki briew ki badonbaem, namarba ka bai-register ka rem. Bad ka lah ban jia ba ki bariewspah kin shu register da ki lum, khlem rep eiei, bad u badukbapli un sah lyngkhuid khlem tynrai ha la ka jong ka Raid. Kane ka long pyrshah ka jingthmu jong u Longshuwa-Manshuwa jong ngi, uba la buh ki riti kiban ai lad ia baroh ban ioh rep-ïoh-riang pahuh ha la ki Raid ki Raid.

(b) Ngì pynkynmaw ia ki para Bhoi ba lada u briew u ichnoh ban rep ia kano-kano ka jaka kumba lai snem bad ia ka nongmei-nongpa kumba hynniew snem, kato ka khyndew ka leit biang sha u paidbah-paidlang, wat la u briew u don da ki phew dulir na ki nong-

synshar Raid ne ki phew register na ki Syiem Hima.

(c) Katkum ka jingbuh u Longshuwa-Manshuwa, kano-kano ka Register, khlem ka dulir ki nongsynshar Raid, kam don-dor eiei ha Ri Bhoi.

6. Ka Ri-bam-'Syiem.

Hapdeng jong ki Khynriam ka ju don kata kaba ki khot ka "Ri-bam-Syiem", kata ka mut, ka pynthor ne kano-kano ka jaka kaba ki paidbah-paidlang ki ai na ka bynta u Syiem Raid ne Syiem Hima.

Katkum ka jingshem jong ngi na ki 'Riewstad ha ri Bhoi, hapdeng jong ngi ki Bhoi ym ju don bad ym ju bna kum kata ka "Ri-bam-Syiem" jong u Syiem Raid ne Syiem Hima, lait noh tang ha ka Raid Nyrleng haba don tang ka Ri-bam-Syiem u Syiem Raid.

7. Ka Jingbuh-bynda.

Kino-kino ki Bhoi ki lah ban buh-bynda ia ki pynthor, ki kper, kiba ki la rep bad dang rep. Ka jingbuh-bynda ia ki lum ne dewshrah bym pat rep ka long ka bymhok bad kaba pyrshah ia ki riti ba la buh u Longshuwa-Manshuwa. Kumjuh ruh ka long ka jingleh-bymhok ban buh-bynda ia ka lyngkha ne kper kaba u briew u mut ban iehnoh ban rep.

Lah ruh ban buh-bynda ia ka nongrim-ing ha kaba dang don bad dang ieng ka ing kaba dang bha ban shong. Ka dei ka jingleh-be-ain ban buh bynda ia ka nongrim-ing ha kaba ym don ing shuh bad ia kaba u briew u kwah ban iehnoh.

Kito kiba ioh ia ka pynthor ne kper ne lyngkha na ka jingbuh-bynda, ki dei ban rep ia ki. Lada kim rep hapdeng lai snem, kato ka pynthor, ka kper ne lyngkha, ba ki la ioh, ki kylla biang ki jong u paidbah-paidlang.

KA LYNNONG IV

KA JINGIADEI JONG KA RI BHOI BAD KI NONGSYN- SHAR RAID BAD KI SYIEM HIMA

Namarba ma-ngi ki Bhoi ngi la klet ia ka jingia dei jong ki Raid ha Ri Bhoi bad ki Nongsynshar Raid bad ki Syiem Hima, ki la mih ki jingshitom-jinglanot-jingkordit jong u baduk-basuk, jong ka sem-shiliang-ka-kup-shiliang, ka jingshah-ban-bein, ka jingshah-kjitsnam (exploitation) bad ka jingduh ia ki khlaw-ki-btap kabym lah ong shuh.

Namarkata, ngi la tohkit bniah na kiba kham nang-kham-tip ban ia ngi, khantam eh ki Syiem Raid, ki Lyngdoh, ki Pator, ki Basan, ki Sordar, ki Maji bad ki Tymmen-ki-sau jong ki Raid. Ka jingshem jong ngi bad ka jingtip jong ngi hi ka long kumne harum :-

1. KA JINGIADEI BAD KI SYIEM, KI LYNGDOH, KI PATOR, KI BASAN, NE SORDAR RAID.

Kumba ngi la ong haneng, ki Syiem, ki Lyngdoh, ki Pator, ki Basan ne Sordar Raid kim dei ki trai jong ka Raid; ki dei tang ki nongsumar bad ki nongpyniaid-kam. (1)

Namarkata, ki nongsynshar Raid kim lah ban leh katba ki mon ia ka khyndew-ka-shyiap, ia ki khlaw-ki-btap, ia ki pynthor-ki-hali, ia ki lum-ki-wah, ia ki iew-ki-hat bad ia kiwei pat kiei-kiei kiba dei ki jong u paidbah-paidlang.

Kim lah ban knieh ne ai ha uwei pat ia ka lyngkha ne jaka kaba u Bhoi ne u trai-shnong jong ka Raid u dang rep.

Kim lah ban ai-wai jar-jar ia kano-kano ka khlaw jong ka Raid ha uno-uno u briew nabar ne napoh ka Raid ba un shalan ia ki dieng ne ban thang-rnga 2), khlem ka jingiatip-lem jong u paidbah-paid-

(1) Peit sla 10

(2) Lada u Bhoi u dei ban thaw ing-thymmai ne ban rep lum, u lah ban pom ia ki dieng ha kato ka jaka kaba u kwah ban thaw-ing ne ban rep lum. Ia kane ym ju khang mynno-mynno ruh. Ia kito ki dieng ba u pom ban pyllait jaka

ban thaw ing ne ban rep lum, u lah ruh ban thang-rnga khnangba kin ym sep ei. Ia kane ruh u Longshuwa-Manshuwa jong ngi um ju khang. La khang tang ban pom kulmar ia ki dieng ban thang-rnga, khlem ka jingtiplem jong u paidbah-paidlang.

tang uba dei u traf jong ki khlaw ha ka Raid. Ka jingmoh na ki khlaw
jong ka Raid ka dei ban lett sha ka Raid na ka bynta ka jingdonkam
jong ka kum ka Raid.

Lada jia ba uwei-ar ki nongsynshar Raid ki ai-wai jar-jar ia kano-
kano ka khlaw-jong ka Raid ha uno-uno u briew nabar ne napoh
ka Raid, khlem ka jingtiplem jong ka Raid, u paidbah-paidlang u don
hok, ym tang ban uxor, hynrei ban khang ruh da ka bor, kumba ki
briew ha ka pyrthei baroh kawei ki ju khang ne kem ia ki nongtuh
kiba rung jubor shapoh ing jong ki.

Kim lah ban die jar-jar ne ai jaka ha u mynder khlem ka jing-
iatip-lem jong ka Dorbar Pyllun bad u paidbah-paidlang jong ka
Raid.

Hynrei u Longshuwa-Manshuwa jong ngi um kwah ba ki nong-
synshar Raid kin long tang kum ki chawkidar-ap-ing. Ki dei ki nong-
sumar bad ki nongpyniad-kam ki badonburom. U paidbah-paidlang
u dei ban burom bad ban niewkor ia ki. Ki long kum ki hymmen ha
kawei ka ing-ka-sem.

Kaba khot ia ki nongsynshar Raid "ki hymmen" ka pynkynmaw
ia ngi ki Bhoi sa kawei pat kaei-kaei kaba u Longshuwa-Manshuwa
u la buh. Ki nongsynshar Raid ki dei ki HYMMEN, ki paidbah-paid-
lang ki dei ki PARA-KI-HEP bad ka Raid ka dei ka KMIE bad ka
ING-KA-SEM.

Ngj dang kynmaw bha ba, ha ka por ba ngj dang khynnah, u
paidbah-paidlang ha Ri Bhoi u ju burom bad niewkor da shisha, ia
la ki nong-synshar Raid kum ki hymmen la jong. Ki dei ki nongsyn-
shar Raid kiba la ju pynbeit ia kano-kano ka kam shnong ne ka
jungiakajia jong ki briew Kim ju kiew sha u Syiem kumba ki leh
mynta, ban pyni ia la ki jam-jot, ban shah niew-bein bad ban pyn-
lut-por-pynlut-pisa Ka la long mynta kumne, namarba ki Bhoi hi ki
kwah ban teh-mraw ia lade.

Namarba ki nongsynshar Raid, katkum ka jingbuh u Longshuwa
ki dei ki hymmen, kum ju tip ia kata ka bam-sap. Haba ki soi ia kano-
kano ka dulr, ki shu pdiang sngewbha katba ki ai ki briew. Hynrei
na ka riew-kynthei, ka sem-shiliang-ka-kup-shiliang, na u rangli-u-
juki kim ju pan ne pdiang bai-soi-kyrteng eiei, namarba ki khein ba
ka dei ka sang ban kjit ia ka snam ki bapli. Mynta te u don u wei-ar
uba khwan-pisa, namarba u tynneng-shrieh ia ka jingleh ki katto-
katne ki nongtrei-kam-Sorkar ne katto-katne ki briew Syiem.

Dei na kane ka daw ruh ba haba uno-uno u kwah ban rung
hapok kano-kano ka Raid ban shong shnong, u dei ban pyntip ia ki
nongsynshar Raid, kiban tohkitt ia ka jinglong jong u bad kiban pyn-
tip ia u paidbah-paidlang ba uta uta u mut ban wan shong shnong
hapoh ka Raid. Ha ki por hyndai u Ni-u-Kong jong ngi, ym ju don

ba lah ban rung kulmar ha kano-kano ka Raid, khlem da pyntip shuwa.

Hynrei ha kine ki snem ki la don ki jingrung kulmar ki briew, khlem da pyntip ia ki nongsynshar Raid bad ia u paidbah-paidlang jong ka Raid. Tang uwei ne ar-ngut ki nongsynshar Raid kim lah ban pynrung jar-jar iano-iano.

Namar kane ka jingrung kulmar ki briew, ki la mih ki jingialeh makotduma khyllah pyrshah ia u paidbah-paidlang, ki la mih ki jingiashun, ki jingiashoh-iadat bad ki jingkulmar laiphew jait. Ki 'riewdakaid, ki nongshohnoh, ki 'riewphet-lok bad kiba la shah beh-shnong na kiwei pat ki jaka, ki la rung sha Bhoi bad ki la pynjynjar-sohsat ia u babun-u-balang, ki la pynduh ia ka jinglongsotti jong ki khynnah-kynthei kiba dang rit ka ryta bad ki la pynkit khunrei ia ki bun ki kynthei Bhoi bapli. Na kane ka daw, ka la mih ka jingbym-kohnguh ia ki ain-shnong, ka jingpynkhein ia ki ain-Raid, ka jingia-kop bad jingmaham hapoh shnong ne Raid; ki la mih ki dustur, ki rukom bad ki riti bapher, kibym dei ki riti Bhoi bad kiba mut tang ban pynjot ia ki Bhoi.

Ka jinglanot ka bakhraw tam eh ka la mih na ka jingrung kulmar be-ain jong ki kharkhuti bad ka jingmih jong ki Pata Kiad kum ki tit (1)

(1) Shaphang ki khar-khuti bad bad ki Pata ngim shym thoh ha ka Kot-khubor. Hynrei ki paralok na Bhoi bad khamtam eh ki 'riewdkhot jong ka Ri Bhoi Dorbar, ki la wan iathuh ia kiei-kiei kiba u Longshuwa jong ngi u la buh shaphang ki khar-khuti bad ki Pata, ia kiba ma-ngi ruh mynta ngi kynmaw bha, namarba kum u Nongiohpateng-hok jong ka jinglonglyngdoh Raid ha ka Raid Thaiang, ha ki snem 1928-29, mynba ngi dang 6-7 snem ka ryta, ngi la ju leit sngap kai ia ki jing-kren ha ka Dorbar Pyllun jong ka Raid Thaiang. Shisien, bad ia kane ngi kynmaw bha, ka la don ka jingiatai-nia, lada dei ban pyn-rung ia ki khar-khuti bad ban buh ia kawei ka Pata. U paidbah-paidlang um shym mon, bad ia kito ki khar-khuti ngim ju iohi bad kato ka Pata Kiad kam shym mih.

(b) Ki khar-khuti ngi mut ia kito ki khar-ri-muid-ri-masi da ki spah bad ki hajar, kiba iaid lait-lan kylleng ka Ri Bhoi bad kiba la pynjot-pynjutor lut ia ka rep-kariang bad ki jynthung-jyntep, tad haduh ba ki Bhoi mynta ki la kyrduh-sat bad ki da kylla mrav ha la ka jong ka jaka. Ia kane ka jingsniew ki dei ban pynduh ki Bhoi hi. Ka District Council ka la pynmih ki ain ban iada ia ki Bhoi na kane ka jingsniew. Hynrei ym lah ban khmih lynti ba kan pynkohja ia ki Bhoi. Ki Bhoi hi ki dei ban iarap, ban iada bad ban pynim ia lade.

Ki Kpa Tymmen jong ngi hyn-dai ki la long ki briew ki batip-briew-tip-blei, kiba burom haduh katta-katta ia ki Bor-synshar bad kiba kohnguh barabor ia ki ain. Mynta katto-katne ki Bhoi kim burom bad kim niewkor shuh ia ki Bor-synshar bad kim kohnguh

Buh ki khar-khuti ki la rung sha ki Raid khlem da pyntip ia ki nongsynshar bad ia u paidbah-paidlang, uba dei u trai-ing jong ka Raid. Ki la rung la ka rung ha kano-kano ka Raid kaba ki kwah, kum ki nongtuh bad ki nongphetwir. Bad ka jingwanrung-kulmar jong ki ka la pynjot thiaw ia ka rep-ka-riang ki Bhoi.

Katkum ka jingbuh u Longshuwa, tang u paidbah-paidlang lem bad ki nongsynshar Raid ki lah ban ai jaka ia ki khar-khuti. Bad ka jingmih na ki shynreh ne ki masi jong ki khar-khuti ka dei ban leit sha ka Raid na ka bynta ka jingdonkam jong ka.

shuh ia ki ain; hynrei ki mane-blei-thaw ia ki. Bad ban mane-blei-thaw ia ki brieve ne ia ka ain, ka dei ka pop kaba wallam ka jingtim ka bajur. Ngi dei ban burom, ban kohnguh bad ban niewkor ia ki Bor-synshar bad ia ka ain, hynrei ngim dei ban mane-blei-thaw ia ki, ngim dei ban pynlong ia ki ki nongpynkohja ne ki aia-ri-khunlung jong ngi.

Ki don ki Bhoi kiba leh kumne: haba ki muid ki rung ban bam ia u kba ha lyngkha ne ha pynthor, ha ka jaka ban leh eiei da la ki kti, kiba u Blei u la ai ban iada ia lade bad ia u kba, ki wan kiew beit sha u Syiem, hana, da kaba ichnoh ia la ka lyngkha ha ka mon jong ki muid bad ki khar-muid bathngan. Haden ar-sngi lynti, ki poi bad ki ahem ba u Syiem bad ki Myntri kim don ha ing, ba ki la leit khwai-doh sha Khwan ne shawei pat. Ki thep ka dorkhas bad ki leit phai noh. Ha shnong, ki lap ba ia u kba la bam lut da ki muid; bad ki muid lem bad ki khar-muid kim don shuh ha lyngkha. Ynda la poi ka Summon u Syiem, ki khar-muid ki len ba ki la leit pynbam kba ia ki muid jong ki ha kata ka sngi; u kren-byrngem u nongwan-rah-summon bad u nongtohkit; u kyuih u Bhoi, um nang kren shuh wat shi kyn-tien ruh, namarba ki brieve Syiem ki dei ki blei-chaw. Te u Bhoi u shah kynnoh nongphasap-kai, katba ka tyngka ka tuid na ka kti ki khar-muid sha ka kti u nongwan-

tohkit. Hato, kane ka jingleh kam dei ka jingmane-blei-thaw ia ki brieve Syiem ne ia ki Bor-synshar? Kane ka jingleh jong ki Bhoi kam dei ka jingniewkor ne jingpyni-burom ia ka ain ne ia ki Bor-synshar. Ka dei ka jingpynjah burom ia ki namarba, da kaba leh kumne, ngi pynhiar ia ki na ka kyrdan Bor-synshar sha ka kyrdan nong-pynkohja bad sha ka kam aia-ri-khunlung. Ki Bor ki kwah ba ki Bhoi kin ieng ha la ki kjat, ba kin iada ia lade bad ban pyni biang ia kato ka mynsiem-shynrang jong u Longshuwa-Manshuwa jong ngi, ka mynsiem bad jingshlur shynrang kaba imat ngi la kum klet.

Ngi kynmaw sa kawei pat ka nuksa kaba pyni ba ki don da shi-sha ki Bhoi kiba mane-blei-thaw ia ki Bor-synshar. Ha ka por ba ngi dang don sha Dkhar, la long Syiem Raid ha ka Raid Thaiang u Mama jong ngi hi, u Pa u Long. Shisien la hiar sha Thaiang u Syiem Khynnah. Ka la jia kael-re-kaei. U Syiem Khynnah, uba dang lung ka ryta, u la bitar lep ia u Pa u long, u la ktah kti ia u bad u la shoh ia u hakmat u paidbah-paidlang, kumba ki nongot-doh ki shoh ia ka masi bym lah iaid shuh. Ki don kiba ong haduh mynta ba kane ka jingsboh ia u Syiem Raid ba la tymmen ka la long khlem daw eiei. Hynrei kim shym leh eiei ban iada ia la u Syiem Raid, wat la u la shah lah, betz haduh katta-katta, nongwan-

Namarkata, lada jia ba kine-kimo ki khar-khuti ki rung khlem da pyntip ia u paidbah-paidlang, ki trai-ing jong ka Raid ki don hok, ym tang ban ufor pyrrshah, hynrei ban beh ruh ia ki da ka bor.

Ka daw ka ba-ar jong ka jinglanot ha Ri Bhoi ka dei ka jingmih jong ki Pata Kiad kum ki tit. Katkum ka jingtohkit jong ngi na ki 'riewdkhot jong ka Ri Bhoi Dorbar, kum u Bah Ling Bhoibalteh, u Bah Dorin Shadap. u Bah Josing Bhoiphur, u Bah Harington Shyng-rang bad ka jingtip jong ngi hi. ha ka por hyndai u 'Ni-u-Kong jong ngi ki Bhoi, shuwa ba kan mih ka Pata Kiad, ki dei ban tip ki nongsynshar Raid bad ki paidbah-paidlang ha ka Dorbar Pylvun jong ka Raid. Khlem ka jingmynjur lem u paidbah ha ka Dorbar Pylvun, ym don mano-mano ba lah ban pynmih Pata Kiad, namarba kane ka ktah ia ka im-ka-iap jong u babun-u-balang.

Namarkata, lada jia ba kano-kano ka Pata Kiad ka mih, khlem ka jingtip u paidbah-paidlang, u babun-u-balang u don hok, ym tang ban ufor pyrrshah, hynrei ban lied bad ban pynduh ruh da ka bor, la ka Pata ka dei ka jong uba napoh ne nabar Raid.

Te, khnangba ki Raid jong ngi ha Ri Bhoi kin kiew shaphrang, ka dei ka kamram jong ki nongsynshar Raid bad ki paidbah-paidlang ban pikir bha, ba ki 'riewdakaid, ki khar-khuti kin ym rung kulmar; bad ba ki Pata Kiad kin ym mih kum ki tit ha ki Rad ne ki shnong.

II. KUMNO LA MIH KA JINGIADEI BAD KI SYIEM HIMA?

Mynta la jan baroh ka Ri Bhoi ka don hapoh ka Hima Myllem bad ka Hima Khyrim. Hynrei nvngkong eh, katkum ka jingtip-bathikna jong ki Tvmmen bad ki 'riewkhmat, ka Ri Bhoi kam shvm don hapoh kitei ki Hima.

Ki 'riewkhmat na Ri Bhoi, kum u Bah Rolin Shadap, u Bah Dlosingh Lyngdoh, U Bah Jesaia Makdoh, u Bah D.D. Lapang; u Bah R.S. Moksha, u Bah Filat Shadap, u Bah Dilton Shadap, u Bah Kilshon Lamare bad kiwei pat, kiba tip bha ia ka histori jong ka Ri Bhoi, ki ong ba "shisien u Syiem Jaintiapur u la hiar thma ia ka Ri Bhoi. La don ka jingialeh ka bajur ha Nongtluh-Nongbri bad ki Bhoi ki la kyllon da ki hajar. Ha kane ka khim, ki Bhoi ki la pan iingia-rap na ka Hima Shillong. Da ka jingiarap jong ka hima Shillong ia

ki la tharai ba ki Syiem Khyannah baroh ki dei ki blei-thaw' ban mane arti-arjat. Te ki la 'shu peit. Bad wat u Pa u Long ruh um shym ialeh pyrrshah cici. U la shah ba u Syiem Khyannah un shoh ia u kumba ki ju shoh ia ki mraw Negro ha kiwei pat ki ri. Tang hadien katto-katne por, u Pa u Long u la iap.

Don kiba ong ba la kheih u bud-lum na ka jingshah-shoh ha u Syiem Khyannah. Hyntei kham bui kiba ong, bad ka 'knie u Long ka dei kawei na ki, ba u la iap namar ka 'jünggewrem bad jingpait dohmud ha u la shah shoh kina u kiew hakhamet ka kynthei-kachyn nak.

jop ia u Syiem Jaintiapur. Haden ka jinjop, ki Syiem Shillong ki la kwah ban leit noh. Hynrei ki Bhoi, ki la pyni ia ka jingkwah jong ki ban iasnoh bad ka Hima Shillong, khnangba kin ym hap shuh ha kum katei ka lanot.

"Ha ka juban-lak, ki la mynjur baroh arliang kumne harum :-

1. Ba ki Syiem Shillong kim dei ki trai jong ki Raid.

2. Ba kin don-bor tang halor khlieh briew bad ba kin bat ta ka nar-ka-bili bad ia u saikhum-saiteh.

3. Ba kin burom ia ki riti baroh kiba la buh u Longshuwa-Manshuwa.

4. Ba ki khyndew-ki-shyiap, ki khlaw-ki-btap, ki lum-ki-wah bad ki iew-ki-hat jong kano-kano ka Raid ki dei ki jong u paidbah-paidlang jong ka Raid ; had kin hap baroh hapoh ka bor jong u babun-u-balang bad hapoh ka jingsumar bad jingpyniaid jong ki Syiem Raid, ki Lyngdoh, ki Pator, ki Basan bad Sordar Raid. Kata ka mut ba halor ka khyndew-ka-shyiap, ki khlaw, ki lum-ki-wah bad ki iew-ki-hat (1) jong ki Raid, ki Syiem Hima Shillong kim don bor eiei ruh em. Bad ka jingmih na ka khyndew-baroh na ki khlaw (2) had

(1) Ngi ainguh shibun ia ki Rangbah na Ri Bhoi kiba la thoh sha ngi ban kdew ia kawei ka jing duna ha ka jynthoh jong ngi ha ka kot-khubor. Ha ka kot-khubor ngi la thoh "ba ki iew-ki-hat ki hap hapoh ka jingpyniaid ki Syiem Hima Shillong, katkum ka juban-lak, hadien ka jingwanhiar-thma u Syiem Jaintiapur." Hynrei kito ki Rangbah kiba la thoh sha ngi ki la pyni ba kam dei kumta. Katkum katei ka juban-lak, ki iew-ki-hat bad ka jingmih na ki, ki hap hapoh ka jingpyniaid ki nongsynshar Raid na ka bynta u paidbah-paidlang ; ka jingmih ka dei ban leit sha ka Raid kum ka Raid.

Ban pynahisha ia kaba ki la thoh, ki la wallam sha ngi ia ka jingrai u Mr. K. Cantlie, uba long u D.C. (K. & J. Hills), ha ka jingialeh jong u Barton Lyngdoh na Nongkharai, ka jingialeh, kaba la nsh naduh 1917 haduh 1938-39, pyrshah u Syiem Myllem. Ki la wan rah ruh sha ngi ia kawei pat

ka Jynthoh, ka "Jingteh-Jutang ka Hima Myllem" kaba la mih ha u snem 1938. Cfr Synrop I.

Ki la iathuh ruh ha ka ktientvmmen "Ka Iew-ka-Syiem" ka dei tang ia ki iew hapdeng ki Khyndew, ym ha Ri Bhoi.

(2) Da kaha ong ba ka jingmih baroh na ki khlaw ka leit sha ka Raid. i) Ngim mut ba ka District Council kam don hok ia ka Bai Royalty na ki dieng ba shalan shabar ka Ri, katkum ka ain thymmai ba ka Dorbar Thaw Ain jong ka District Council ka la pynmih ha kine ki snem.

ii) Lait na kane ka Bai Royalty sha ka District Council, ki Raid ha ri Bhoi kim don kam ban siaw Bai Royalty iano-iano. Katkum ka jingbuh u Longshuwa-Manshuwa jong ngi ka jingmih na ki Raid ka dei ban leit sha ka jingdonkang jong ki Raid. Lada ki Raid, ki kwah ban aingewbha, kata ka shong ha ka jingagewbit jong ki

na ki iew ki-hat ka dei ka jong ka Raid bad kan leit sha ka Raid na ka bynta ka jingdonkam jong u paidbah-paidlang, kum ki skul ha ka por mynta.

"Da kane ka juban-lak, ka Ri Bhoi bad ka Hima Shillong ki la ialong noh kawei ban iarap bad ban iade iwei-ia-iwei pat na ki nong-shun.

"Ha kane ka juban-lak, ym shym ai bor eiei ia ki Syiem Hima Shillong ban phah-shong khar-khuti ne ban pynmih ia ki Pata Kiad ha ki Raid ne ki shnong. (1)

"Hadien katto-katne por, la phiah noh ia ka Hima Shillong ha ka Hima Mylliem bad ka Hima Khvrim; bad ha kane ka jingphiah, la phiah ruh ia ka Ri Bhoi ha ki ar-bynta, shi bynta sha ka Hima Mylliem bad shi bynta sha ka Hima Khvrim."

Kumne ki iathuh ki 'riewkhmat na Ri Bhoi, ki briew kiba tip bha bad tip lut ia ka histori jong ngi.

KA KTIEN PYNKUT

Katkum ka jingtip jong ngi, kine ki riti, kiba ngi la battai haneng ki dei kiba kham kongsan eh. Bad ngim lah ban len ba ki long ki babha bad ki bajanai. Ha kine ki riti, ka jingbha-mynstem bad ka jingstad jong u Longshuwa-Manshuwa jong ngi ki Bhoi ka paw shai-kdar. Ki la sngewthuh bha ba ka khyndew bad kiei-kiei baroh, kiba u Blei u la shu aiei, ki dei ban myntoi ia u paidbah-paidlang baroh, ym tang katto-katne ngut.

Ngi la shem ba ha kane ka pyrthei baiar ki don ki briew kiba kam ri-kynti ia ka khyndew ka baheh haduh katta-katta. Ma-ki hi kim rep bad kim lah-bor ban rep; bad ka sah da ki snem khlem rep, katba u baduk bapli um don jaka rep eiei ruh em. Ngim kwah ban pynrem ia ki riti jong kiwei, namarba ngim don hok ban leh kumta. Hynrei ma-ngi ki Bhoi ngi dei ban kham niewkor ia la ki jong ki riti, kiba la buh da U Longshuwa-Manshuwa jong ngi hi, namarba ki long ki babha da shisha. Bad ngi kymen ba ki Bhoi baroh kin sdang ban niewkor biang ia kaba u Longshuwa-Manshuwa jong ki u la buh na ka bynta ka jingbha jong ki.

Ka dei ka kamram jong ki nongsynshar Raidt bad jong u paidbah-paidlang ha Ri Bhoi ban phikir bad ban peit bha ba kino-kino kiba wan sha Ri Bhoi ki dei ban sumar ia ki riti Bhoi jong ngi, kumba ma-ngi ki Bhoi, haba ngi leit sha Dkhar, sha Khynriam, sha Pnar ne sha War, ngi dei ban im katkum ki riti jong kito ki jaka. Ka basngew-sih ka long ba don katto-katne ki Bhoi kiba kwah ban teh-mraw ia lade da kaba bud ia ki riti kibym dei ki jong ngi. Ngi ngeit skhem ba kine kin phai biang sha la ki Longshuwa-Manshuwa bastad jong

ki bad kin pyllait-luid ia lade na ki kynjri-nar ba ki shah teh mynta, da kaba bat skhem ia ki riti ba la buh u Ni-u-Ma kulong la jong,

Lada don ki para-Bhoi kiba kwah ban kynthoh etei ne ban ioh jingbatai, ki lah ban leit sha ki 'riewdkhot jong ka Ri Bhoi Dorbar bad kito ki Rangbah kiba la paw kyrteng ha kane ka kot. Ngi la ioh ruh ia ki kyrteng jong kiwei pat ki Rangbah na ki 'riewdkhot jong ka Ri Bhoi Dorbar. Ma-ngi hi ngim ithuh ia ki baroh, hynrei ngi la loh-sngew ba kine ki Rangbah harum ki dei kiba ieid bha ia ki riti jong ngi ki Bhoi bad kiba tip bha shaphang jong ki, kum u Bah Thren Bhoibalieh, u Bah Pishon, u Bah Brister Marsharing, u Bah Red Mohon, u Raton Sordar, u Pamen Monsing, u Bah Krim, u Bah Walter Maring, u Bah Mana Sten, u Bah Leonard Maring u Bah Donatus Shadap, u Bah Phlorian Lyngdoh, ki Tymmen Basan bad ki Rangbah shnong Umroi, u Pa ka Mom, u Jolin Syiem Thaiang, u Bah Bishon Basan Nongkhap, u Bah N. Shadap, u Bah Sipshon, u Bah Reidwell, u Bah Brensley, u Bah Kyrtan, u Ship Basan, u Bah Bili na Korhadem, u She Sordar Pamlatar, u Sngid Lyngdoh, u Bim Sordar Mawlaho, u Bah Mi Sordar Shadklew, u Bah Rana Sordar Iamkhon, u Bah Lio na Mawtari, u Bah Lat bad u Bah Hormu. Kito kiba na Burnihat, ki lah ban iakynduh ia kine ki Rangbah, kiba dei artad ki Gambura, kum u Bah Poklein Barua, u Bah Molindro Barua, u Bah Thorikbarika Tanulkushi, u Bah Mohan Ray Kutki, u Bah Sajon Syiem Marwet, u Bah Binon Lyngdoh, u Bah Kim Nongkylla, u Bah Lelai Borbhuin, u Bah Satpro Pyngker, u Bah Hang Plilyngku, bad u Bah Jit Umsapar.

Na ki thain Iapngar bad Bhoilasa, u riwkhmat uba tip bha ia kine ki riti u dei u Bah Win Marpan, Mawtneng.

KA SYNROP I

A. – Katto-katne ki kyntien na “Ka Jingiateh-Jutang ka Hima Myliem,” kiba iarap ban pynshai ia kaba ngi la lum-lang bad pynmih ha kane ka kot shaphang ka jingiadei ka Ri Bhoi bad ki Syiem Hima.

1. Ha ki por ba la lah.....la mih rukom rukom ki jingpyrshah ban kyrthom ia ki hok jong ki khun ki hajar bad ki Raid ha ka Hima. Bunsien eh, ki Nongsynshar..... ki la shu pdiang ia kaba ong bad leh.....ki Syiem kat haduh ba la mynsaw jur ki hok ki briew ba ju don kat kum ki Riti bad Dustur ba ju don. (1)

Kumta.....la sngew donkam ba dei ban da iateh Agreement da kaba shai ban tai ia ki hok jong ki briew bad ki Raid, ba u Syiem ban mih bteng ia u Syiem Kmuin Manik u dei ban teh shuwa ia lade, shuwa ba kin ai kyrteng Syiem ia u, ba un ym prong kper biang kumba la leh kito ki Longshuwa jong u – bad ba un mane ia kito ki dustur bad ki hok.....

(Ka Kyntien Lamphrang da u A. MacDonald Kongor, sla 1.)

2. Ka Dorbar Syiem ka long tang ka dorbar bishar ia ki mamla, hynrei kam don bor ban buh khajna halor u khun u hajar ka hima, bad kam don bor ruh ban ai ne aiwai ne die hano hano ruh ia ki khyndew kiha hapoh jong kano kano ka raid. (Lynnong VI, 3; sla 4).

3. U Syiem u long u nongsynshar ne nongbishar halor ki briew (2), kumjuh ruh ka Dorbar Syiem jong u. U Syiem um don bor eieihalor ki khyndew ki raid; um lah ban ktah ha kano-kano ka rukom ia ki khyndew ki raid ruh.

Ka Dorbar Syiem ruh kam don bor eiei.....halor ki khyndew raid. U Syiem um lah bad ka Dorbar Syiem ruh kam lah, ban aiwai ne pata ne die hano hano ia kino kino ki khyndew jong kano kano ka raid..... (lynnong IX, 1, 2, 3, 4; sla 5-6)

(1) Ngì la iohsngew ba bun ki Bhoi ki la hap ha kane ka apot, ba ki la shah bishar ym katkum ki riti-ki-dustur Bhoi jong ngi, hynrei katkum ki dustur ne riti jong kiwei pat. Ka jingpynmih

jong ngi ia kane ka kot ka long ban pyllait ia ki Bhoi na kane ka lanot.

(2) “Halor ki briew” ka muthalor khlich-briew, ne, shimet-shimet.

4. Dei tang ka Dorbar raid (1) kaba lah ban aiwai ne pyngmih jingpymyntoi na ka khyndew ka raid,.....u khun Khasi nangno nangno ruh u lah ban wan shong, thied ne ioh khyndew,.....da kaba ia sngewthuh bad ki rangbah raid (2)ba uta u khun Khasi u dei ban da pynpaw shai ba un kohnguh hapoh ka jingsynshar ka raid,.....

Kino kino ki khun Khasi kiba napoh kino-kino ki raid (3) ne kiba dei ki trai raid ne kiba shong ha kata ka raid (4) ki lah ban trei ne pyndonkam ia kano kano ka khyndew raid bad ia kiet kiet baroh kiba don ha kata ka khyndew, tangba ki dei ban don hapoh ka jingsynshar jong kata ka raid hynrei lada ki khaili ne die (5) ia ki dieng ki siej kiba dei lang jong kata ka raid ki dei ban da siew katkum ka jingpynshongdor ka jingsynshar kata ka raid. (Lynnong X, 3, 4; sla 6-7).

5. Ka jingmih baroh na ki shynreh ne masi (6) ne kino kino kiwei pat ki jingmih (7) hapoh ka raid ki long ki jong kata ka raid hi bad ka jingpynaid ia kata ka long da ka dorbar raid U Syiem lane

(1) Ka Dorbar Raid ha Ri Bhoi kam kynthup tang ki Syiem, ki Lyngdoh, ki Pator, ki Basan ne Sordar Raid, hynrei ka kynthup ruh ia u paidbah paidlang Ha ki kam khyndew, katkum ka jingbuh u Ni-u-Kong hyndai jingngi ki Bhoi, u paidbah-paidlang u dei ban tip, namarba u dei u babun-u-balang u trai jong ka khyndew ha kano-kano ka Raid.

(2) "Ki Rangbah raid" hangne kam mut tang uwei ne arngut ki nong synshar raid, ka mut ba shuwa ba uno uno ubym dei napoh ka raid un wan rung ha ka Raid, ki nong-synshar Raid lem bad ka shnong haba u mut ban shong, kata, u paidbah-paidlang, ki dei ban ioh jingtip. Khlem ka jingmynjur jong ki baroh, ka long ka jinglehbe-ain ban shu rung kulmar kum ki nongtuh ne nongphetwir.

(3) Kane ka mut ba ki briew jong kawei ka Raid ki lah ban leit shong sha kawei pat ka raid kumba la batai haneng.

(4) "Kiba shong ha kata ka raid" ka mut kito kiba la long ki 'riewdkhot jong ka raid. Khnangba u-

no uno un lah ban rep katha mon bad kat haba mon, u dei ban long u paidbah-paidlang jong ka raid. Lada u briew u shong ha kawei ka raid, hynrei u kwah ban rep ha kawei pat, um lah ban rep kat haba u mon bad katha u mon; u dei ban da ia sngewthuh bad ki nongsynshar raid bad u paidbah-paidlang.

(5) "Ban khaili bad ban die" hangne ka mut ban shalan-khaili ia ki dieng ki siej. Kam mut haba u briew u die kai ia ka diengiap ba u la ioh na ki dieng ba u pom ban rep-lum ne ban thaw ing. Kumjuh ruh, ban thang-rnga ban shalan-khaili ym bit khlem ka jingtip lem bad jingmynjur jong ka raid bad u paidbah-paidlang. Hynrei bit ban thang rnga ia ki d'eng ba la pom ban rep-lum ne ban thaw ing, khnangba kin ym sep ei.

(6) "Ki shynreh ne ki masi" ka mut ia ki shynreh ne masi jong ki khar-khuti.

(7) "Kino kino kiwei pat ki jingmih" ki kynthup ruh ia ki kawei hat.

ka dorbar Syiem kim don bor satia ban leh eiei na ka jingmih na kata ka raid lynda kata ka raid ka ai sngewbha katba ka dorbar raid ka ibit. (Lynnong XIII, 1, 2, sla 9).

6. Ka ju don ka khrong na ri Bhoi kaba khot ka bheth-ka-bhar (1) (Lynnong XVII, 1; sla 11)

7. KI KHYNDEW RAID. Ki mut ia kano kano ka khyndew hapoh ka Raid ia kaba ki briew jong kata ka raid, ne ki trai raid jong kata ka raid ki lah ban iatrei bad pyndonkam, bad ia kaba ki briew na kiwei ki raid ruh ki lah ban pyndonkam da kaba ki don jingiasngewthuh jingnut bad ki rangbah kata ka raid "bad ka jingiatip-lem jong u paidbah-paidlang jong kata ka raid." (2). (Lynnong XXVI, 2; sla 20).

B. - Ka shithi jong ki Rangbah na Bhoi shaphang ki iew-ki-hat.

Rev. Father,

Ma-ngi kiba soi kyrteng harum ngi la pule ia ki hok ki riti kiba phi la pynmih ha "U Nongsain Hima" bad ngi kubur ba ki long kiba la buh-la-seng da u Longshuwa jong ngi ki Bhoi.

Hynrei ngi la shem kawei ka jingduna. Phi la thoh ba ki "Iew-ki-hat bad ki jingmih na ki" ki hap hapoh ka jingpyniaid ki Syiem Hima Shillong, katkum ka juban lak hadien ka thma bad u Syiem Jaintiapur. Kane ka bakla khyndiat. Katkum ki riti Bhoi jong ngi hi, ki iew-ki-hat bad ki jingmih na ki baroh ki dei ki jong ki Raid kum ki Raid, bad ka jingmyntoi ka leit sha u paidbah-paidlang na ka bynta ka jingdonkam jong ki, kum ki skul ne kiei-kiei kiba tadei bad ka Raid.

Ia kane ngi tip thikna bha na "Ka Jingiateh-Jutang ka Hima Myllem", kaba ki la pynmih ha u snem 1938, ha ka por u Sati Raja, bad na ka jingialeh jong u Bamon Lyngdoh na Nongkharai ha ki snem 1917-38.

Ha ka Lynnong XIII, sla 9 jong ka Jingteh-Jutang ka Hima Myllem la thoh kumne :-

1. Ka jingmih baroh na ki shynreh ne masi ne na kino kino kiwei pat ki jingmih hapoh ka Raid ki long ki jong kata ka Raid hi bad ka jingpyniaid ia kata ka long da ka dorbar Raid.....

(1) "Ka bheth-ka-bhar" ka dei kata ka jingiasngewbha jong ki Bhoi ha ki Syiem Hima, bad kam dei ka khajna.

(2) "Bad ka jingiatip-lem jong u paidbah-paidlang jong kata ka raid" ki dei ki kyntien jong ngi.

2. U Syiem lane ka Dorbar Syiem kim don bor satia ban leh eiei ne kim don hok ban dawa eiei na ka jingmih na kata ka Raid lynda kata ka Raid ka ai sngewbha katba ka Dorbar Raid ka ibit.

Na kane phi iohi ba ia ki iew-ki-hat la kynthup ha "kino-kino kiwei pat ki jingmih," bad ba ki Syiem Hima Shillong kim don hok ban dawa ia ki iew ne ki jingmih na ki, lada ka Raid hi kam ai sngewbha.

Te kato kaba ngi khot ka "bhet-ka-bhar" kaba ki Syiem Shillong ki ju ioh ka dei ka jingaisngewbha jong ki Raid na Bhoi bad ym ka hok jong ki, bad ka shong ha ki Raid bad ha u paidbah-paidlang ban dang ai ne ban ym ai shuh. Ka dei kane ka jingmut jong kito ki ktien ha ka Lynnong XVII, sla 11 jong ka jingiateh-jutang ka Hima Mylliem, "Ka la ju don ka khrong na Ri Bhoi kaba khot ka bhet-ka-bhar . "


Ngü kyrpad ia phi ban pynpaw madan ia kane namarba ka long kaba kongsan eh na ka bynta ka jingbha jong ngi ki Bhoi.

Khublei shibun eh

Kiba burom ia phi,

Dated Tyrso,
1-10-1965

Sd/- Dringwell Rymbai
" Bill Singh Stone Matlang
" Hill Singh Matlang
" Linshon Lapang
" Dliton Shadap
" Gracewell Tiron
" Robes Doloi
" Pilat Shadap
" Philip Duia
" Kilshon Lamre
" D. Syiem (Umroi)



KA SYNROP II

KI JINGKYLLI BAD KI JUBAB

Phadar bateid,

Katba ngi dang ia kren shaphang kito ki hok-ki-riti u Longshuwa-Manshuwa jong ngi, kiba phi la pynmih ha ka Kot-khubor, ka jing-iakren ka la pur sha ki Syiem Hima, kiba ngi la shu iohsngew, ki la kam Ri-Bam-Syiem sha Bhoi, ki la kam ia ki wah-ai-um-kba-pynthor bad ia ki um-dih ruh.

Ma-nga bad ki para-lok ngi kwah ban tip la ka dei ne em kaba ngi la iohsngew.

Khublei shibun eh,

Umriliang,
15-10-1965

Uba burom ia phi
Sd/- P. Lamare

KA JUBAB: 1) Shaphang ka Ri-Bam-Syiem, peit sla 19 no. 6.

2) Shaphang kaba "kam ia ki wah-ai-um-kba-pynthor bad ia ki um-dih", ngi tip skhem ba phi la iohsngew bakla ma-phi ne ki la iathuh bakla ki briew ha phi. Ki Syiem Hima kin ym leh kum ia kane kaei-kaei, namarba ki sngewthuh hi ba ka dei kaei-kaei ka bakhylah-sngi haduh katta-katta, ka bymhok bad ka baphyrshah ia ki riti jong ngi.

Phadar bateid,

Nga la pule ia kito ki dustur ba la buh u Longshuwa. Katkum kito ki dustur, ym don ka jingdie-duh, hynrei tang ka jingsiew ia ka bai-lut-bai-sep. Kane ka long ka badei. Hynrei nga la kum ioh-sngew ia kawei kaei-kaei kaba la pynlyngngoh ia nga.

Ki ong ba la don ki briew kiba la die khyndew ha kane ka rukom ha Ri Bhoi jong ngi, ka rukom ka bapyrshah ia ki riti-khyndew u Manshuwa. Ki ong ba uwei u briew u la die ia ka khyndew ha ka dor ka babiang bad ha kine ki kyrdon :-

1. Nga die ha phi ia kane ka jaka, hynrei ngam die-duh. Man la u snem ha bakut u Lber phi dei ban siew khajna 20 tyngka shi snem. Hadien lai snem ba phim siew ia kane ka khajna, phin duh ia ka khyndew.
2. Ia ka khajna lah ban pynkiew katkum ka jingsngewbit jong nga u Trai.

3. Lada phi die ia kane ka"jaka, phi dei ban pan jingbit shuwa na nga u trai bad phi dei ban siew bai salami 10% na ka dor ba phi die.
4. Phin don hok tang ia ka sla-khyndew. Ia kaba shapoh khyndew, phin don hok, kum ki maw bad kumta ter-ter.
5. Hapdeng shiphew niem, phi dei ban pynthymmai ia ka Patta, lynda kumta phin duh noh ia ka jaka.
- 6 Bad sa kiwei pat kiei-kiei.

Sngewbha jubab lyngba ka Kot Khubor "U Nongsain Hima", ne ha kano-kano ka rukom ba phi sngewbit.

Khublei.

Sohphoh,
20-9-1965

Uba burom ia phi,
Sd/- Mana Sten

KA JUBAB · Ngim mvinjur bad phi ba kato kaei-kaei kaba phi la iohsngew ka long da shisha kabɔ pynsngewlyngngoh bad kaba kham khyllah ban ia kato kaba u Bah P. Lamare u la thoh haneng. Kum kane ka jingdie-khyndew ym ju don bad ym lah ban don ha Ri Bhoi jong ngi. Wei ba u briew u la siew ia ka bai-lut-bai-sep, ka khyndew ka dei ka jong u katba u dang rep ne katba u dang shong-ing. Ka khajna, ka bai salami, ka jingpynthymmai Patta, ki dei kiei-kiei kiba iapyrshah ia ki hok-ki-riti Bhoi jong ngi. Bad uto u Bhoi uba la thied ia kato ka jaka um donkam ban bat ia kito ki kyrdon, kibym dei ki riti Bhoi.

Hynrei ngi hi ngi tharai ba kum kane kaei-kaei ym pat ju jia ha Ri Bhoi jong ngi; bad ngi ngeit skhem ba phi la iohsngew bakla na kiwei pat. Te wat khuslai elei. Ka jaka ba phi rep ne phi shong, ka long kum ka ri-kynti jong phi bad phi lah ban tih shispah mer shapoh niamra katba phi mon.

Kane ka rukom die-khyndew imat ka dei ka dustur jong ki Khyriam. Lada ka long kumta, ngim kwah ban bishar ne pynrem ia ka dustur kiwei pat, kumba ma-ngi ki Bhoi ngim kwah ba kiwei kta bishar ne pynrem ia ki riti jong ngi. Hynrei katto-katne ki Rangbah nardeng ki Khyriam hi ki la iathuh ia ngi ba wat hapdeng ki Khyriam ruh kane ka rukom die-khyndew kam dei ka riti ba la buh u

Ni-u-Ma kulong shuwa ban wan ki Phareng. Kine ki Rangbah ki ong ba ka la mih ha kine ki sawphew ne sanphew snem. (1)

KA SYNROP III

Katto-katne ki shithi na ki Tymmen-ki-san bad ki hymmen-ki-para Bhoi sha u Nonglum-lang bad Nongpynmih.

1. Na ki Rangbah Raid Sordar Tyrso.

Phadar,

Ngi kum ki Rangbah Raid Sordar bad ki Tymmen-ki-san, ngi sngewtynnad shi katdei eh haba ngi iohi ba phi pynmih katto-katne shaphang ki ain ki rul kiba dei shaphang ki khyndew ki shyiap ba la buh u Longshuwa-Manshuwa ha Ri Bhoi jong ngi. Ngi kyrpad ia phi ha phi dei ban pynmih kham kloï ia ki ha ka kot.

Kiba burom ia phi.

Dated Tyrso,
7-9-1965

Sd/- Sewa Sordar Raid Tyrso,
Pilat Shadap
J. Jinus Roy.

(1) Katto-katne na K1 Rangbah kiba ngi la kylli ki dei kine harum:-

a) U'Pa'iem Jum: ngi la kylli ia u ha ka 26 tarik u Risaw, katba u dang shongkai ha phyllaw-ing jong u.

b) U Bah Sabu War: (70 snem ka ryta) la kylli ha u Risaw.

c) U Bah H. R. Diengdoh: la kylli ha u Nailur.

d) U 'Pamen Mowell Sohlang (85 snem ka ryta): la kylli ha ka 24 tarik u Risaw bad u la jubab, "Kane ka rukom die ka la mih

ym bare-re ia ka sawphew snem."

e) U Bah Dren Diengdoh (60 snem palat ka ryta): la kylli ha ka 23 tarik u Risaw.

f) U Bah H. Hynniewta: la kylli ha ka 23 tarik u Risaw.

g) U Bah R. Kharkongor na Mylliem: la kylli ha ka 23 tarik u Risaw.

N.B. Ngim lah ban bishar lada kane kaba ki ong ka dei da shisha ne em; hynrei ngi tip ba kine ki Rangbah ki long kiba lah ban shaniah.

2. Na u Nonghikai ha Burnihat.

Phadar Sngi Lyngdoh,

Nga kum u Nonghikai Skul ha la ki jong ki dong Ri Bhot, nga pynpaw ia la ka jungsngewnguh haba nga la iohi ia ki hok-ki-riti jong ngi kiba la buh u Longshuwa-Manshuwa, ki la mih ha ka kot-khuhor. Namarkata, nga kum u Nonglukai Skul nga kwah ba phin shon ne pynmih ia ki ha i kot barit khnaug ba ngin ioh ban hikai ha ki khynnah Skul jong ngi.

Nongkyipad rit,

Dated Burnihat,
10-9-1965

Sd/- Jesbill Roy Makdoh,
Teacher Burnihat,
P.O. Burnihat.

3. Na u Nonghikai ha Pynthor-Bhoilasa.

Phadar Sngi Lyngdoh,

Nga kum u Nonghikai nga kwah ba phin pynmih ia ki hok-ki-riti jong u Longshuwa naduh ki kpa jong ngi khnaug ba ki khynnah Skul kin pule ha ki kot barit ha kin pule shaphang jong ki.

U nongthoh-kyipad,

Dated Pynthor Bhoilasa,
16-9-1965

Sd/- Jemiwell, Nonghikai
ha Pynthor-Bhoilasa

4. Na u Sordar Pynthor Bhoilasa.

Phadar Sngi Lyngdoh,

Nga kum u Sordar shnong ha Pynthor Bhoilasa, ha ka kyrteng u paidbah-paiklang, nga kwah ban pynmih ia ka hok ka riti u Longshuwa-Manshuwa ba kan mih ha ki kot rit ba kin pule shaphang ki Barim Mynshuwa, ba kin tip shaphang ki kpa jong ngi.

Dated Pynthor Bhoilasa,
20-9-1965

Sd/- Jwen Singh Sordar,
Pynthor Bhoilasa

5. Na u Kobal Lyngdoh.

Phadar baieid,

Ma-nga, kum u Lyngdoh jong ka Raid Bhoilasa, nga la sngewbha shibun ban iohi ia kito ki riti-khyndew ba phi la pynmih ha ka kot-khubor. Kine ki riti kin iarap ia ngi shibun ban iada ia lade bad ban kiew shaphiang ha ka longbriew-manbriew.

Nga tharai kan kham bha shibun lada phi pynmih ia kine ki riti ha ka kot-rit, ba baroh kin dup lah ban tip ia ki.

Khublei shibun.

Dated Bhoilasa,
22-9-1965

Uba burom ia phi,
Sd/- U Kobal Lyngdoh.

6. Na ki Basan Iapngar.

Hymmen baieit,

Ngi ki Basan bad katto-katne ki Rangbah hapoh ka Raid Iapngar, Khyim Syiemship, ngi kyrpad ba phin sngewbha ban ai ha ngi da ka kot lyngkdop ba la suh bad ka snep na ka bynta ki am, ki riti-khyndew jong ngi ki Bhoi ba la buh u Longshuwa-Manshuwa, ia kiba phi la pynmih ha ka kot-khubor "U Nongsain Hima".

Kiba kyrpad rit bad burom ia phi,

Dated Iapngar,
29-9-1965

L.T.I. of Mita Syiem,
" Klan Lyngdoh,
" Shren Doloi,
" Dren Doloi,
Sd/- Phlim Singh Basan,
" Sardro Singh Shadap,
" Hiran,
" Kwellshon Mujai.

7. Na ki Umket-Nongtraw.

Phadar baieid,

Sngewbha ban pynmih ha i kot lyngkdop ia ka ain bad dustur Bhoi jong ngi ba la buh ki kpa tymmen jong ngi, namar ngi kwah ia kaban ioh ia ki.

Khublei shibun.

Dated Umket-Nongtraw,
30-9-1965

Sd/- Sellington Masharing, Secretary.

8. Na u Basan Raid Namsha.

Phadar Sngi,

Nga u Basan ka Raid Namsha nga sngewtynnad shi katdei eh ha kaba nga iohi ba phi la pynmih katto-katne ki ain kiba dei sha-phang ki khyndew ki shyiap ba la buh ki kpa tymmen hapoh Ri Bhoi jong ngi. Kyrpad ia phi ba phin sngewbha ban pynkloi ban pynmih ha i kot.

Uba burom ia phi,

Dated Ingsaw, Raid Namsha,
7-10-1965

Sd/- U Sawa Basan, Raid Namsha

9. Na Umpawin.

Phadar Sngi baieid,

Ngi la ioh jingkyrkhu ha la pynmih ia kito ki hok-ki-riti khyndew u Longshuwa jong ngi.

Na ka liang u paidbah, nga kyrpad ban ioh ha ka kot rit ba yn tip baroh sha Umpawin

Khublei shibun.

Dated Umpawin,
16-10-1965

Nongkyrpad,
L.T.I. of Naren Shadap.

10. Na ka shithi u Rangbah-shnong Umroi sha "U Nongsain Hima, 14-8-1965

Ma,

Nga sngew ba ma-ngi ki Bhoi ngi dei ban sngewnguh ia u Rev. Fr. Sngi ba u la lum bad pynmih ia kito ki riti-khyndew ha ka Kot-khubor Badonburom jong phi ha ka 4 tarik u Nailar.

Ma-nga kum u Rangbah shnong nga sakhi ba kito ki riti-khyndew ki long ki badei bad kiba la buh da u Longshuwa jong ngi ki Bhoi. Ngi ki Bhoi ngi dei ban bat ia ki. Ngi donbok shibun ba ka Constitution bad ka Sorkar jong ngi ruh ki burom ia ki ain ba la buh u Ni-u-Kong hyndai jong ngi ki 'riewlum.

Uba burom ia phi,

Dated Umroi,
5-8-1965

Sd/- Roswell,
Rangbah-shnong Umroi

11. Na u Maji ka Raid Thaiang.

Rev. Fr. Sngi,

Ma-nga kum u Maji ka Raid Thaiang bad ha ka kyrnteng kiwei pat ki Rangbah na ki Thain jong ngi, kum u Bah Brensley, u Bah Kyrtnan, u Bah Saphi Lyngdoh, bad u Bah Liowell na Mawtari, nga kwah ban pyni ia ka jingkmien ba phi la lum bad pynmih ia ki hok ki riti jong ngi ba la buh da ki Kpa Tymmen hyndai.

Kine ki lok baroh ki kyrpad ruh ia phi, lada phi don lad, ban pynmih ha i kynja kot barit ba ki briew baroh kin bna ia kine ki riti u Longshuwa.

Ka jingshah-lehbein jong ngi ha ki khar-khuti, ym lah batai. U trai shnong u la long u mraw jong u mynder. Kine ki riti kin pyllait ia ngi aa kane ka lanot bad ngi ki Rangbah ngin ieng ban iada ia ki.

Khublei shibun eh.

U Nongkyrpad rit.

Dated Mawpat-Thaiang,
20-10-1965

Sd/- Harington Shyngtang,
Maji Raid Thaiang.

KA SYNROP IV

KI RITI-BISHAR BA LA BUH U LONGSHUWA-MANSHUWA HA RI BHOI.

Tang shu iohngew ba la jan mih ka kot lyngkdop shaphang ki riti-khvndew, katto-katne ki nongsynshar na ki Raid Bhoilasa, Iapngar, Tyrso, Thaiang, Nongkhap bad Nongtaring ki la wan kyrpad ia ngi ban pynpaw pvrthei ruh ia ka RUKOM BISHAR ia ki briew ha Ri Bhoi, kumba la buh u Ni-u-Kong hyndai jong ngi. Kine ki Rangbah ki sngew ba ka long ka badonkam eh ban pynshai ia ki paidbah-paidlang ha Ri Bhoi shaphang kane, namarba mynta la mih ki jingkulmar laiphew-jait, ka jingbymniewkor shuh ia ki Tymmenki-san, ia ki Rangbah shnong bad ki nongsynshar Raid, ka jingjynjar bad jingshitom-lanot ki baduk-hatoi, ka sem-shiliang-ka-kup-shiliang bad ka jinglut-por bad pisa kabym lah ong shuh.

Katkum ka jingbuh jong u Longshuwa-Manshuwa, man la ka shnong ha Ri Bhoi ka dei ban don ka Dorbar-shnong, u Rangbah-shnong, ki Tymmenki-san ba la jied kyrpang. Ha ka Dorbar shnong, u paidbah-paidlang jong ka shnong u lah bad u dei ban toh bynta leni. Hahor ki Dorbar-shnong ka don ka Dorbar Raid.

Haba jia kano-kano ka jingiakajia hapoh shnong, nyngkong-nyngshap eh ka dei ban tip bad ban bishar ka Dorbar-shnong. Uno-uno uba shah leh-bein, uba shah tuh bad kumta ter-ter, u dei ban pyntip ia ka Dorbar-shnong. Namarba ka shnong ka dei kum ka ing-ka-sem, bad kito kiba iakajia ki long kum shi-para, ka Dorbar-shnong ka pyrshang ban pyniasuk da kaba pyni ia uto, uba la palat ha ka kam ne ka ktien, ia ka jingbakla jong u. Ka jingkwah jong u Long-shuwa-Manshuwa jong ngi ka long ba ki arliang-mamla, kiba rung sha ka Dorbar-shnong kum ki nongshun, ki dei ban mih kum shi-para da ka jingieid bad jingsngewthuh-lem. Ia ka Dorbar-shnong la buh na ka bynta ka im-suk-im-sain jong ka shnong, ym ban pynshitom-pyn-kordit ia ki brieve.

Ka long ka jingbymniewkor ia ka Dorbar-shnong, ka jingleh-be-ain bad ka sang hakhmat u Blei bad ka shnong-ka-thaw, ban leit dorkhas beit sha ka Dorbar Raid ne Dorbar Syiem Hima, khlem da pyntip shuwa ia ka Dorbar-shnong. Bad ha ki por hyndai, ka Dorbar Raid ne Dorbar Syiem Hima kam ju pdiang ia kum kito ki dorkhas, kibym shym pat iaied lyngba ka Dorbar-shnong, namarba ka dei ka hok tynrai jong ka Dorbar-shnong ban tip bad ban bishar shuwa ma-ka ia kano-kano ka jingiakajia hapoh shnong.

Haba ka Dorbar-shnong kam lah shuh, namarba ki arliang-mam-la ki la kyllut bad kim sngewthuh shuh ia ka nia, te ka Dorbar-shnong hi ka phah noh ia ki sha ka Dorbar Raid. Ym ju donkam ba uwei na ki mamla un thoh dorkhas biang sha ka Dorbar Raid. La biang ka jingpyntip jong ka Dorbar-shnong.

Ka Dorbar Raid ruh ka pyrshang ban pynsngewthuh bad ban wallam ka jingsuk da kaba pyni ia ka badei bad ka bymdei. Ha ki por ba ngi dang rit, ki kam ki baeh katno-katno ruh ki kut noh da ka basuk ha ka Dorbar Raid.


Ka dei ka jingleh-be-ain bad ka sang ban leit dorkhas beit sha ka Dorbar Syiem Hima, khlem da pyntip ia ka Dorbar Raid. Ha ki por ba dang synshar ka hok-ka-sot, ka Dorbar Hima bad Dorbar Syiem kim ju pdiang ia kano-kano ka dorkhas kabym shym la phah bad aiti ha ki da ka Dorbar Raid.

Haba ka Dorbar Raid kam lah ban leh efiei shuh, namarba ki arliang mamla ki la kyllut ki shkor bad ba ki la matlah ki khmat haduh ban ym iohi shuh ia ka nia bad ym tip shuh ia ka hok-ka-sot, bad ba ki la lamwir kum ki mrad-khlaw ba khlem jingsngewthuh, da kaba kwah ban ialeh haduh ban da um u ryndang, ka Dorbar Raid khatduh-khatwai ka phah ia ka dorkhas ba la ioh na ka Dorbar-shnong, ia ka jingrai jong ka bad ia ki arliang-mamla sha ka Dorbar Syiem ne Dorbar Hima.

Kumne ki ju leh ki Longshuwa-Manshuwa batip-brieve-tip-blei jong ngi ki Bhoi. Hynrei mynta, namar ka jingwan-rung kulmar ki

'niewdakaid nawei pat, yni don shuh kata ka burom-surom ia ka Dorbar-shnong, ta u Rangbah-shnong, ia ki Tymmen-ki-san, ia ka Dorbar Raid bad ia ki nongsynshar Raid. Da kane ngim mut ban kynnoh pop ia baroh ki hymmen-ki-para Khasi jong ngi na Khyriam, na War bad na Pnar. Ngì dap da ka jingkmèn ban pynpaw madan ba ki babun hi ki long kiba niewkor ia ka ain ka riti jong ngi ki Bhoi, kiba burom ia ka Dorbar-shnong bad ia ki Tymmen-ki-san, kum kito kiba shong-rep mynta ha Nongtraw. Hynrei ki don katto-katne kiba la leit pynkulmar ia ki kam-shnong-kam-thaw sha Bhoi, kiba la pyn-dik-pynsohsat bad pyniam-kthang ia ki baduk-barangli da ka jingleh-be-ain jong ki. Tang kawei ka nuksa. Ka la jia ha kine ki snem ba ki shakri jong uwei u nongsor uba shong-rep ha Ri Bhoi, ki la tuh ia ki siej ba la pom uwei u Bhoi baduk ban ker ia la i kper barit. Haba une u trai-siej u la shem ia la ki siej ha phyllaw uto u nongshet-kiad, u la ong, "Kine ki dei ki siej jong nga. Nga ithuh bha ia ki." "Lada ki dei ki jong phi," la jubab u nongshet-kiad, "to rah noh sha ing kein." U Bhoi bapli u la shaniah ia kito ki ktien bad u la rah noh ia la ki siej sha ing. Hynrei hadien katto-katne sngi ki la wan-hiar ki briew-Syiem ban kem-ban-teh ia uto u Bhoi, namarba la dorkhas pyrshah ia u da u nongshet-kiad ba u la tuh ia ki siej jong u. Thret kyndit u Rangbah-shnong bad ka Dorbar-shnong! U la leit dorkhas beit sha u Syiem, khlem da pyntip ia ka Dorbar-shnong bad ia ki Tymmen-ki-san! Hynrei namarba ki briew-Syiem ki long kiba don tdong-ryndang bad u nongshet-kiad na sor u long u bariewspah, ki Bhoi ki thangiong-ngain bad ki phet kum ki khnai-rabit. La leh bein ia uto u Bhoi kum u ksew. Ban bah jamin, hana, ka lok ka la dei ban siew laiphew tyngka, ki tyngka ba ka la kynshew da ki bnai ban thied jain ia ki khun ha ka por tlang. Hadien pat ki la dei ban kiew sha Shillong, ban pynlut ia ka por bad ia ki pisa ba ki la ioh da kaba die ia u kba shi-shang-ar-shang uba ki don.

Hynrei mynta ka la poi ka por ban pynsangeh bad pynduh noh ia kum kine ki jingjia basngewsih. Ngì dei ban kohnguh, niewkor bad burom ia ka Dorbar-Shnong, Dorbar Raid bad ia ki Tymmen-ki-san ba la phuh 'niuhlieh. Kito ki shynrang Bhoi ki ba la kylla kynthei bad kiba la rit-mynsiem kum ki khnai-rabit, ki dei ban ioh biang ia ka jinglong-shynrang bad jingshlur jong ki Longshuwa-Manshuwa jong ngi. La poi ka por ba baroh ki Bhoi ki dei ban kynmaw ba ki long ki khun-ki-ksiew jong ki briew ki bashyurang-mynsiem, ki batip-briew-tip-blei bad kiba TREI SMAT.



Printed at the
DON BOSCO PRESS - SHILLONG